

惜抱軒全集

冊五



惜抱軒文後集六

碑文

光祿大夫東閣大學士王文端公神道碑文

并序

公諱杰字偉人王氏先世居山西洪洞遷陝西韓城居五世至石門縣主簿諱廷昭公之考也以公貴贈光祿大夫東閣大學士公妣吳太夫人生三子長濬仲澈公為季端凝好學見於幼稚長以拔貢生得教諭未任遭父喪服終貧甚為書記以養母所居幕府尹文端公繼善陳文恭公宏謀之為江南督府時也兩公皆名知人而最賢公謂為正士乾隆庚辰 恩科中鄉試次年 恩科中會試殿試讀卷官進擬第三 純皇帝親拔為第一

引 見風度凝然

上益喜授翰林院修撰

由修撰四轉得詹事府少詹事 日講起居注官

直南書房旋晉內閣學士歷工刑禮吏四部侍郎

都察院左都御史母喪回籍在籍擢兵部尚書

詔服闋赴職充 經筵講官 賜紫禁城騎

馬爲 上書房師傅直軍機處乾隆五十一年正

月拜東閣大學士公爲人廉靜質直誠於奉職其

居位與和珅同列公以大體接之不爲壯頌悻悻

之事而遇所當執終不與和珅附公素行無疵瑕

純皇帝知公最深和珅雖厭公亦不能去也

如是數年及 今上臨政公意益得發摠矣然

公嘗念大臣所當爲者非盡於所能言獨居意嘗

邑邑深念而不怡蓋公之心人必不能具識而至

其入陳 禁陞裨益朝廷者又非人所得聞故不

可得而述也嘉慶七年公以老病乞休 詔予在

籍食俸加太子太傅 御製詩送之有云直道一  
身立廊廟清風兩袖返韓城足以盡公生平矣嘉  
慶九年公與夫人八十歲又有 御詩及頒賜諸  
物公季冬入都謝 恩留至十年正月十日薨於  
京邸 命榮親王奠醑 賜銀二千兩治喪又  
賜祭葬贈太子太師祀賢良祠諡曰文端公爲乾  
隆庚戌科會試總裁官又嘗爲湖南江西浙江考  
官一督福建學政三督浙江學政所進多佳士其  
于門下士相愛甚篤然未嘗少涉私引教之必爲  
君子而已夫人程氏四子主事堦時監生埈時武  
選員外郎埈時廩膳壞時孫九子公葬於韓城北  
原生旣立神道之碑乃刻銘曰

科第士首爵位朝碩德器優優以居無忤大臣之  
度遠思邈邈去名釋功匪惟以激事賴其休物被

其澤惟其志宏歎而不懌

天子知之降予載

赫著厥儀形

紫光之閣顧思德音公逝弗作過

墓思敬瞻此穹石

吏部左侍郎譚公神道碑文并序

公諱尚忠字因夏南豐譚氏其先世多聞人矣及  
公成乾隆辛未科進士授戶部主事三徙爲山西  
道監察御史出爲福建興泉道又入爲刑部員外  
郎再出爲廣東高廉道三遷至安徽巡撫降福建  
按察使再遷至雲南巡撫入爲刑部右侍郎調吏  
部左侍郎嘉慶二年十一月二十八日薨于位公  
之在戶部也嘗司寶泉局及高宗純皇帝察  
局中事惟公無纖豪私染在興泉時以洋行事例  
降官上又察知其不汙故復進用其在封疆  
爲大吏室中澹泊寒士遇屬員甚有禮藹然親也

獨不能少入之以財利天下論吏清儉者必舉譚  
公爲首然公遇事奮發則執誼不可回其爲安徽  
巡撫以忤和珅致降爲福建按察使在福建復屢  
以事與督撫爭至督撫同官事尤相牽而爲撫者  
每委曲以就督公在雲南獨能持正裁之且謂曰  
公自爲其德吾自任其怨可也其丰采峻厲如此  
故公雖和平廉潔而非煦煦曲謹者也其教子有  
曰人當先約其身身約則心約心約則事不踰閑  
然後可以擴充爲有本之事功矣故公所至興利  
去害必究其原委曲折之盡則斷然行之使所蒞  
必蒙其澤而後已去則民多涕泣送之

高宗

純皇帝嘗稱爲正人可任事

今上亦絕重之

而公遽沒矣公在安徽姚鼐主敬敷書院時接談  
燕食設五器而情厚有餘及聞公薨而悲今又十

年矣公子光祥以庶吉士改禮部主事自京師移書至曰先公既葬矣而碑未立某夙奉公教宜爲文至其家世及夫人子姪之詳則編修陳用光誌之矣故不具銘曰

公居士林文學悻悻接物以情不爲阻深秉節當官蔑敢私干進者宜之退者弗怨歷邇及遐隴坻海嶠攘袂姦蠹耄孺鼓樂晚爲侍從公望在衆殂未及登刊石載頌

墓表

中憲大夫保正清河道朱公墓表

公諱瀾字問源其先吳人顧氏也明天啓時有以義憤擊魏闖所使緹騎逮周順昌者避匿江甯自是爲江甯朱氏 國朝始爲江甯學生者曰應昌生贈編修圻贈編修生康熙己丑科進士翰林院



編修元英編修生江甯學貢生贈通議大夫松年  
嘗舉孝廉方正不就早卒公之考也公生八歲而  
孤家貧身弱妣舒太夫人苦節撫而教之稍長卽  
遊幕於外以供養蜀楚閩徼無不至於民情美惡  
政教利病無不曉卒在直隸通永道幕爲總督方  
恪敏公所知保舉以從九品職引 見發河工補

楊邨主簿值漕船起撥運丁有多奪小船以病衆  
者公往數語諭之卽服公名自是起歷縣丞知獻  
縣河間縣務闕同知務闕治河官也公治運河有  
績而上官惡之以報水遲解其職會有大臣出勘  
河患乃保留公公始以水漲患民田廬請上官修  
治爲斥拒至是陳於使者功舉畿輔民獲甯焉逾  
年授天津府同知卓異擢正定府知府再擢清河  
道公在道職凡五年而五署按察使方公之爲知

縣所臨案無留牘屢以平反寃獄稱明允於直隸  
矣及攝臬司尤以獄爲重每屬吏所不能決公親  
研鞫或晝夜據案披訊經月不輟所定必當罪全  
無辜者甚衆又爲獄囚疾設隔別之法令無傳染  
籌得歲千餘金爲獄中薪炭醫藥之費至今爲利  
歲饑總理賑救勤察無遺濫值

高宗純皇帝

至趙北口 召公見於行幄時以水災請蠲魚葦

課 上問魚葦宜水者而亦蠲何耶公曰水小

則魚聚葦生大則魚溢出而葦沒爛 上大稱

善又詢數事皆稱旨將大用之矣而以審案稽遲

去職公之四攝臬司也爲日淺甚有盜案在保定

府未定上其後盜發他省供首盜在保定而未究

出 上怒自總督以下皆得過方以法繩下雖

知公在職暫不特宥也久之乃 賜復原銜旣又

令總督遇相當缺出題補然公久勞於官致憊自以老疾乞歸不能仕矣時乾隆五十六年也

上後猶數問其疾愈否公竟於嘉慶元年九月十九日卒於江甯里中年七十三公生平嚴持清節而施人則甚厚仕歸資業蕭然嘗著才識論謂處事以識爲主而才副之不可偏廢不得已而去甯無才不可無識故其立身治民必求其大者要者云所著待潮書屋存稿四卷又詩二卷待潮雜識二卷歷官紀要二卷夫人陳氏誥封恭人生子三紹曾安徽布政使賢仰早卒續曾靈州知州側室于氏生子二顯曾候選縣丞述曾承曾俱候選從九孫七桂棟候選同知桂楨己未進士文選司主事桂馨桂森桂柱桂樞桂楹女十一人孫女十人公與夫人合葬於江甯

桐城姚鼐爲之阡

表二云

修職郎碭山縣教諭瞿君墓表

君諱塘字激川嘉定人有文學爲王光祿鳴盛門人光祿稱之以商籍爲錢塘學生由廩貢得教諭嘗署浙之嘉定甯波淳安學官矣卒改歸本籍乃爲碭山教諭奉上官檄察邳州水災君不避勞苦所察得實旣又值旱災君察之亦然民被災多賴以存者父艱歸服終署昭文元和金壇學官所至皆爲諸生所親樂然君厭塵事遂謝病不復出託居蘇州閶門之北君爲人篤謹和易未嘗有疾言厲色於鄉里遭喪以毀得疾數年遂習爲導引通道家之說夜長不寐年六十嘉慶九年坐而逝妻諸孺人賢恭稱君配生子中浩中溶先君九年卒嘉慶十年合葬長洲之天森山側室周氏生子中

淦中濟中溶娶錢少詹事大昕之女嘗見鼎於江甯今葬君以王侍郎昶之銘寄示余於懷甯余掇其要以表其墓

姚休那先生墓表

休那先生之先世自婺源遷桐城白苓里是爲白苓姚氏居九世曰一邃爲諸生而早卒妻吳氏爲節婦子士晉士晉後改名康而字休那焉爲明諸生有雋才高識而屈於場屋里中何文端延之入都文端爲吳江周忠愍宗建墓誌爲世稱其文史家今據以爲傳出先生手也文端告歸後數年被召又邀先生同行先生知世不可爲嘗題臥猿詩以諷之文端遂稱病而反先生後入史相國幕中故史公檄文多爲世稱然先生旋歸里得免揚州之難改革之後屏居田野鬱邑悲傷作忍死錄以

記其家自曾祖以下四世事其言最悲痛平生文字爲人作與自爲者相半凡十餘卷藏於家惟評貨殖傳黃巢傳刻傳於世順治十年卒年七十六先生存時史相國爲豫題墓曰明讀書人姚康之墓卒後百五十年同里姚鼎述其生平表於碣云

石屏羅君墓表

石屏羅君諱會恩字際叔宗人府丞諱鳳彩之孫隴西知縣諱元琦之子有文學數不第退居修行於家其事父母盡孝養之誠父歿使婦侍母寢數年母終免喪而後婦復君乾隆戊子科舉人也吏部選爲安甯州學正君不忍離母竟不就官其兩執喪皆能如禮有兩兄兩弟以事以撫能恭以愛其遇族里誠且直責人言或至切而人感其意不爲怨也里中事宜謀於公所君卓然建議躬任其

勞必衆利而後已其身終於鄉而人信其才足以任世事也嗚乎士溺於俗久矣讀古人之書聞古人之行事意未嘗不是之而及其行事顧憚不能效也如羅君可謂勇於爲而不負其學者已君嘉慶九年卒葬於懷甯之

江濬源銘之逾一二年

桐城姚鼐爲書其生平之概俾其弟勲恩揭諸墓

上云

婺源洪氏節母江孺人墓表

江孺人婺源江某之女爲洪永禧之妻永禧家貧甚勤耕薄田未明而興逾昏而息孺人歡然共其勞有子三于一歲殞其二永禧痛之甚亦亡孺人獨撫六歲仲子立登於田間殆無以爲生矣於是晝督傭客夜執針黹茹苦積瘁以至子立登之長出賈乃稍有贏孺人顧好調恤有負其財者念其

貧憊棄券而復資之而自奉則儉不欲逾田家時  
有孫鈞自幼餐宿皆依其側長則督之學立登後  
居於江甯鈞亦來江甯從余學爲余言孺人所以  
訓之者率如古賢母言而孺人目不知書其貞哲  
天性然也孺人亡年七十有五其喪夫時逾三十  
於例不應旌表余嘗論女子夫亡守志有未三十  
而守猶易有逾三十而守倍難者例有定而人所  
遭不可定也孺人之執節可謂難矣因書其實俾  
鈞刻諸墓上云嘉慶十一年秋七月桐城姚鼐表

臧和貴墓表

武進臧氏有孝子曰禮堂字和貴家貧無僕役躬  
執薪水之事以事父母能盡愛養父病瘡畏寒惡  
火和貴每夕身溫其被父喪三日不食二年不入  
內如禮母疾割股禱而母愈其初娶也懼婦不能



孝其親作七言辭以教婦婦至使人抗聲誦俾立  
聽畢而後合盃苟有益於親之事必忘身而爲之  
也苟足悅其親雖違衆不顧也和貴與兄庸皆好  
學博聞尤精小學善讎校爲四方賢士所貴而和  
貴不幸年三十而死桐城姚鼐嘗識庸聞和貴之  
學行未見也今以天下悲惜和貴之情乃爲表其  
墓云

姚氏長嶺阡表

姚氏自餘姚遷桐城始遷曰勝三公勝三公後四  
世以農田爲業五世爲明雲南布政司右參政諱  
旭有政績而貧參政卒子孫復修農田三世皆有  
隱德參政四世孫諱自虞爲諸生其子諱之蘭爲  
汀州府知府加按察副使銜所歷海澄縣杭州汀  
州二府民皆爲祠以祀參政副使任績明史皆載

入循吏傳副使之子諱孫棐任爲職方主事職方  
之子文然仕 國朝康熙時以刑部尚書終諡曰  
端恪至 世宗時追論先朝名臣思其賢詔特

祠春秋祀焉祠今在城東門內端恪公之第四子  
諱士基以舉人爲羅田縣知縣羅田民以奉入名  
宦祠羅田府君之次子是爲贈編修公鼐之祖也  
年二十六而卒配任太恭人賢孝秉節上奉姑下  
教二子長子爲翰林院編修諱範次子爲贈禮部  
員外郎諱淑鼐之考也贈編修公承累世賢哲之  
遺風敦行勤學而不幸無年編修府君旣孤憤發  
策勵外友天下賢俊以相資長爲詩古文辭故同  
里則劉才甫山陰則胡稚威常熟則邵叔向皆編  
修所尤厚也而編修自沈究遺經綜括先儒茹精  
晰微萃成已得然仕爲翰林數歲不究其用而歸

歸著書亦未及竟而卒此天下士所共爲歎惜者也當端恪公薨羅田府君買得墓地居長嶺之巔去城七十里將葬端恪而羣從子以爲遠僻不用乃別葬後羅田府君卒亦別葬羅田長子中書公與贈編修公相繼沒矣而故買長嶺之山其契藏族君子來安訓導文默之笥吾家不知也有謀葬地就來安求售來安不許然後吾家得聞任太恭人乃命編修兄弟奉中書及贈編修公合葬於此山雍正之六年也又其後編修公沒未葬任太恭人及龔父贈禮部公皆別葬矣龔與伯兄昭字乃奉編修及伯母張太宜人合葬贈編修墓下之右其時龔繼妻張宜人亦未葬又葬於編修張太宜人塚右時乾隆五十二年也故姚氏之阡爲塚三而有五柩焉自是後又二十年贈編修公諸孫盡

喪獨存懼舊德遺事泯不聞乃謹書以列諸隧  
左中書公諱孔鐸字振修康熙三十九年舉人候  
選內閣中書舍人康熙四十九年卒年四十一娶  
廣德州學正方曾祐女生二子興漢興濼二孫漣  
支幹贈編修公諱孔鏌字瓊修縣學生康熙三十  
七年卒贈承德郎翰林院編修累贈朝議大夫禮  
部儀制司員外郎娶懷甯任氏大理寺少卿諱奕  
鑿女生二子有八孫編修子曰縣學附貢生昭字  
南甯府同知義輪舉人登監生勣隆縣學增生斟  
元贈禮部子曰刑部廣東司郎中鼎候選州吏目  
訐副榜貢生鼎編修府君始名興諫今贈編修墓  
所列其舊名也後改名範乾隆七年進士改庶吉  
士授翰林院編修乾隆甲子科順天鄉試同考官  
三禮館纂修官乾隆十五年歸里乾隆三十六年

卒年七十娶縣學生贈內閣侍讀張若霖女乾隆三十九年卒年七十四今合祔焉生子五鼎始娶張宜人卒繼娶張宜人乃前婦其五世祖妹也爲屏山縣知縣張諱曾敏女其始權厝鼎有銘矣茲不具

贈中憲大夫湖廣道兼掌河南道監察御史  
加二級孟公墓表

國家定制一品官封贈三代得及曾祖父母而有特令官未至一品而願以己及身及妻應得封典特乞施加及曾祖父母者呈請部臣奏聞而一詔命焉蓋所以伸人子孫追遠事亡之至情又以示士有積善者或遠或近期必蒙報於後世此又聖朝錫福之廣所以勸天下之爲善也乾隆五

十三年 覃恩封贈諸臣之家而太谷孟御史

生蕙請以所應受之封贈及曾祖已故候選府經歷奉 旨允給於是遂贈公中憲大夫湖廣道兼

掌河南道監察御史加二級夫人趙氏贈太恭人  
公諱鴻品字飛陸其立身有行義事親尤孝謹愉  
色婉容能曲成親心其考邑庠優生既亦君子也  
母武孺人皆樂公之能養志公外接人無城府獎  
正疾邪而能有容其教子孫必爲正士謂士品立  
則可富貴亦可貧賤士品一墮富貴則驕溢貧賤  
則卑污均爲可恥公生於康熙十五年卒於雍正  
十一年年五十七後六年葬孟家莊東南原又後  
四十年而得贈官焉趙夫人年九十乾隆二十九  
年卒祔公墓子三人長熙邑庠生贈朝議大夫湖  
廣道監察御史次照次烈 恩賜從九品鄉飲耆  
賓孫八人啓周贈中憲大夫工科給事中啓疆歲

貢生汾陽縣教諭馳封奉政大夫順天府西路同  
知啓堂國學生贈文林郎清河縣知縣啓林啓域  
啓堃啓墉啓基曾孫十八人生蕢贈中憲大夫生  
蕢乾隆癸未科進士歷官至通政司參議文蔚府  
經歷生葦乾隆戊戌科進士順天府西路同知生  
蘭生菖庠生生藻生英從九品生萬生芮生茂生  
芬生菘生荃生康生傑生夔生度元孫以下人材  
滋起人謂公德之貽甚遠不享於其身而光於後  
嗣未有艾也鼎與公會孫生蕢爲同年友生蕢遺  
書令爲阡表鼎愧不文顧以通家晚列仰望懿美  
國恩家慶皆可贊述因書所聞見以謂可爲賢  
者慰矣

博山知縣武君墓表

乾隆五十七年當和珅秉政兼步軍統領遣提督

番役至山東有所調察其役攜徒衆持兵刃於民間凌虐爲暴歷數縣莫敢何問至青州博山縣方飲博恣肆知縣武君聞卽捕之至庭不跪以牌示知縣曰吾提督差也君詰曰牌令汝合地方官捕盜汝來三日何不見吾且牌止差二人而率多徒何也卽擒而杖之民皆爲快而大吏大駭卽以杖提督差役參奏副奏投和珅而番役例不當出京城和珅還其奏使易於是以妄杖平民劾革武君職博山民老弱謁大府留君者千數卒不獲然和珅遂亦不使番役再出當時苟無武君阻之其役再歷數府縣爲害未知所極也武君雖一令而功固及天下矣君諱億字虛谷偃師人乾隆四十五年進士其任博山縣及去官才七月而多善政民以其去流涕君自是居貧常於他縣主書院讀經



史考證金石文多精論明義著書數百卷今  
皇帝在藩邸聞君名及親政召君將用之而君先  
卒矣君卒以嘉慶四年十月二十九日年五十五  
余與君未及識第聞其行事讀所著述今遇君子  
穆淳於江寧爲文使歸揭諸墓上君行足稱者猶  
多而非關天下利害茲不著嘉慶十八年二月桐  
城姚鼐表

贈中憲大夫武陵趙君墓表

君諱宗海字匯川其先世居歙之巖鎮宋之宗室  
也有朝散郎不佞之裔孫字仲容者自歙遷於湖  
南爲武陵人君之祖也君考曰商山早世君二歲  
而孤繼又喪母乳媪哀而育之於家稍長出入里  
閭恭慎勤敏異於常人時武陵有王西崖妻劉安  
人寡居而賢知能鑑人生一子一女女聰慧過人

知古今書史劉安人奇之欲得良婿見趙君愛之  
曰此孤兒後必大乃以女女焉是爲王太恭人也  
君遂爲王氏贅婿治生爲賈然能敦信而輕利遠  
近服其爲人所交多四方長者當趙氏來武陵猶  
有貲君考之亡族人皆侵取之君旣立家顧厚於  
族人尤甚微弱者皆依以成立先世柩在歛未葬  
者君皆安葬之人有事就謀者必忠告而爲盡力  
焉以積勞卒卒年四十時王太恭人年三十八君  
未沒時綢繆趙王兩姓皆立門戶子皆能讀書矣  
太恭人兄春埜爲名諸生太恭人以子屬教之今  
觀察也及君喪太恭人督教子益嚴嘗杖子而杖  
折太恭人識歲月於折杖而藏之初君所受託以  
財賄者有數千金及君沒頗乏償貲或謀以孤寡  
辭而弗與太恭人曰吾夫信義故人託之今弗償

爲夫取惡名也乃破產鬻室中衣物以盡償負其  
周恤族黨親故之事甚衆人謂君固賢而成君賢  
者亦內助也君與太恭人以子貴屢被 國恩封  
贈而今觀察爲編修時以己及妻應得之封贈贈  
外祖及劉安人云君之子二曰慎畛嘉慶丙辰科  
進士今爲廣東惠潮道慎峻君與王太恭人合葬  
於善又嘉慶十八年冬桐城姚鼐爲之表

太夫人墓表

吳太夫人者吳縣人事太子太保直隸總督方恪  
敏公爲側室而今尚書浙閩總督維甸之母也尚  
書生十一歲而孤歸居江甯或見其孤弱侵侮之  
太夫人置不與論而自刻勵勤苦彌甚教子極嚴  
不使稍有子弟之過嘗篝鐙治女紅而課子誦讀  
于側每至夜分及尚書長成進士登朝則日勉以

道義忠敬之事而治家以勤以樸不改于初尚書  
或被 使命出戀侍膝前雖行萬里磧外太夫人  
必正色責其速行急 國事不得少佇逮旣出門  
而爲涕泣焉當恪敏公存時兩從子孤幼撫之身  
側太夫人愛誨之與己子無少異故今侍郎河南  
巡撫受疇嘗述於

上前

上聞爲太息及

太夫人亡而令持一月之服也其天性尤好聞人  
爲善及有慶樂事則欣喜若在己苟力所及則必  
助之其有不善或憂苦則戚然不安者移時於舊  
怨則忘之而令子更以厚待旣以子貴 國恩得  
封太夫人而

上稔知其賢屢

加賜問嘉慶

十八年卒于江甯里第年八十五

上聞 特

使江甯將軍至宅祭之命婦加祭非常典以旌德  
也是歲十月甲子朔葬于句容北葆山恪敏公之

西麓惟太夫人徽懿徹於九重惠澤洽於閭巷  
朝廷賴毓成之器室家奉先立之型核厥嘉休宜  
垂後世墓成之日桐城姚鼐述爲之表

... 而令持一月之...  
... 善及... 事則...  
... 則之其有不善或憂...  
... 他則忘之而令子更...  
... 垂為... 之日... 殺... 之妻...  
... 陳... 之... 未立... 嘉...  
... 西... 夫人... 重...

惜抱軒文後集七

墓誌銘一

安徽巡撫荆公墓誌銘并序

荆公諱道乾字健中蒲州府臨晉人也以縣學生  
中乾隆二十四年山西鄉試三十一年挑發湖南  
爲知縣所莅麻陽龍山東安永順皆有賢蹟而在  
東安卻鹽商歲餽千金則俗吏以爲恆事固當受  
者也於是上官舉公卓異矣適丁太夫人憂服滿  
乃引見仍發湖南候陞復補龍山調善化前後  
在湖南十二年擢甯夏同知又舉卓異擢池州府  
知府公清介端謹與人甚和易而臨公事無纖毫  
內顧之私故尤爲當世賢者所貴諸城今劉相國  
墉撫湖南時以謂第一良吏也大興朱尚書珪撫  
安徽亦謂公第一自池洲調鳳陽安慶又舉卓異

擢登萊青道歷山東按察使江蘇布政使嘉慶四年秋授安徽巡撫距其去安慶時未五年也公既習于安徽又繼朱尚書後其治相似以安民便俗爲要其有所陳奏雖其事有爲天下督撫所不欲言者公皆直達於上

上亦知公之至誠也公任巡撫兩年病作請解任上令公養疾

待少愈入都將處以內職然公竟以嘉慶七年三月癸酉卒于安慶年七十二卒後人哭者視其幃被如寒士喪行吏民送者莫不涕泣

上聞有詔愍惜賜祭令山西巡撫俟喪終擇其子若孫送引見焉公會祖諱爾極祖諱毓光考諱德

志皆贈如公官有二兄其一先卒公夫人姚氏亦先卒其第二兄學乾常與公居官舍晝同器食夜同室寢依依如幼稚以至於終子二澤桓澤楛歸



葬公

請鼎爲銘鼎目睹公清修令德以謂當

世達人才傑蓋多矣若夫真樸淳至表裏如一則無以逾公故舉公行如此其吏事之常雖有善能猶於公爲不足道也銘曰

以德爲寶以義自好其行皜皜

帝曰賢哉宜

臨江淮載離載來治以道靖煦良宥昔悲哀法狎德人之祥衆戴曰臧歿而不忘歸葬河汾有慕故民銘其幽墳

廣西巡撫謝公墓誌銘并序

公諱啓昆字蘊山世居江西南康之蘇步公後徙居南昌南郭乃以蘇潭爲自號云公於乾隆二十五年庚辰科會試中式次年殿試以朝考第一名選庶吉士年二十五乾隆三十一年授編修

旣而充國史纂修官日講起居注官出爲鎮

江府知府又知揚州府甯國府擢授江南河庫道  
浙江按察使山西布政使調浙江布政使 今  
上親政命爲廣西巡撫凡三載嘉慶七年六月乙  
丑終於位年六十六公爲知府時卽明決于吏事  
所持堅正上官雖異意而不能奪屢以善績稱江  
淮矣及爲藩司其時各省官帑多缺或公私相替  
閱歷數官前後援倚所虧愈多不可補復公持身  
廉潔而智能究郡縣利病之多寡立法以其羸絀  
相補任使盡其能操縱當其時故所益不數年無  
造怨于吏民而能完久虧之額他人或欲效公所  
爲輒中窒而不能遂故公爲藩司多美政而世尤  
稱公理財爲最善及至廣西內治吏民外撫夷獠  
築湘灘之隄以爲民利民呼曰謝公隄又嘗興學  
校飭營伍文武皆懷愛之其卒也以盛暑步禱雨

致疾世傳上聞甚悼惜賜金治喪又詔賜祭  
葬其後廣西士民呈於大府請以公入祀名宦之  
祠公自少本以文學名博聞強識尤善爲詩其才  
宏贍精麗兼具唐宋名家之體所爲樹經堂集若  
干卷雜古文四卷西魏書若干卷小學攷若干卷  
晚成廣西通志若干卷則士謂公文學吏治蓋兼  
存於其中焉曾祖諱茂偉祖諱希安考諱恩薦皆  
以公貴贈資政大夫妣皆贈夫人公娶某縣李夫  
人生女繼娶某縣劉夫人生子學增候補主事先  
公卒側室四盧孺人生子二學崇嘉慶壬戌科進  
士庶吉士學炯候選府同知女一衛孺人生子學  
培候選府同知管孺人生女三高孺人生女一公  
在翰林時爲乾隆庚寅恩科河南鄉試正考官  
辛卯會試同考官多得賢才其最者巡撫會稽陳

水文布政司歷城方昂以吏蹟名而檢討曲阜孔  
廣森以文學顯其在浙舉孝廉方正亦多名士生  
平重交游獎氣類居廣西作懷人詩數十篇首其  
座師大興翁學士方綱次桐城姚鼐也遺命其子  
必使鼐爲墓銘嘉慶年 月 日學崇葬公

鼐爲銘曰

儒者之風退然其中剛果有能作吏見功北甸汾  
洮南及嶺嶠沒而民思生被其曜惟其多才文武  
惟試講藝賦詩異於俗吏 帝褒良績天祐厥  
家妥奉棨居銘幽詔遐

通奉大夫廣東布政使許公墓誌銘并序

公諱祖京字依之德清許氏曾祖諱煌甲祖翰林  
院編修南昌府知府諱鎮考舉人西安教諭諱家  
駒三世皆以公貴贈通奉大夫公少勤學工文辭

乾隆戊子科中浙江鄉試第一人己丑科成進士授官內閣中書貧甚徒步懷餅入直暮而出歷七年內閣侍讀缺公次當擢金壇相國于文襄公欲別擬人矣聞公論謂許舍人不得擢爲不平乃卒擢公在內閣兩遇京察皆一等丁酉科充四川鄉試正考官復命奏對稱旨旋命爲雲南驛鹽道逾三年擢雲南按察使屢辦疑獄悉精當得情姚州有劫盜以刀背傷事主司擬死罪上部駁謂刀背雖金非刃不當死承審官知州誤擬應降職公言州本擬如部所論臣飭改之咎乃在臣奏上純皇帝愈以此重君擢廣東布政使公在雲南時值總督李侍堯怙勢求賄其後事發得罪屬吏多爲所累降絀公初不迎附卒亦不與其咎及在廣東仁和相國孫文靖公爲總督值林爽文亂

臺灣文靖馳至潮州調兵餉甚衆公抗言臺灣亂當卽平不可無故先用粵民文靖得牘怒甚欲奏公沮軍會臺灣平乃止及毅勇貝勒相國福文襄公爲總督勢益重而公守意自如文襄之護安南阮惠入朝公定郡邑供帳有限數阮惠行出廣東緣道官乃務極華侈傳單至達 行在所 純皇帝以讓文襄文襄乃歎公初所定豐約之當也廣東濱海民雜易擾公治之凡十年於事患多所消弭民有欲請於瓊州開鑛者公駁不許又有欲於省設船步網利者公亦不許民以晏然乾隆五十九年以請養歸逾一年丁母蔡太夫人之憂旣而病居杭州就醫嘉慶十年二月二十一日卒於杭州年七十四公強識過人少所見文字至老未嘗忘治官事勤甚累日夜廢寢食不疲其在雲南

不置幕客文案皆親定之又以餘力訓子爲學其在內閣修官書一統志西域圖志西域同文志勝朝殉節臣錄皆獨當其勞平生自著書則有書經述入卷詩四卷許氏譜二卷藏於家夫人同縣進士祁縣知縣胡官龍女賢明有禮先公卒四年子二翼宗國學生早卒宗彥嘉慶己未科進士兵部車駕司主事女一適山陰王思鈞胡夫人先葬武康春岡嶺上青浦王侍郎昶銘之矣嘉慶 年 月 日啓穴以公夫人合葬焉桐城姚鼐爲之銘銘曰

公以儒興操筆文雄秉節吏能愍愚察病勇爲衆靖優哉從政其道蹇蹇建謨伊善植躬靡忍禁闢著庸山徼海邦身去慕從天靳民澤錢塘之郭公臥不作有配允賢魯祔茲阡厥嗣昌延

中議大夫通政司副使婺源王君墓誌銘并

序

君諱友亮字景南王氏自宋祕書少監炎居婺源  
其子孫皆家焉 國初居婺源之漳溪者曰承裕  
生贈中憲大夫啓仁啓仁生候選縣丞贈中憲大  
夫士鏡士鏡生平陽府同知贈中憲大夫文德平  
陽之子三長順德知府廷言次工部虞衡員外郎  
廷享次卽君君十歲能詩稍長文名大著以貢生  
中乾隆三十年順天鄉試舉人三十四年會試取  
爲中書舍人四十六年成進士授刑部主事歷員  
外郎擢山東道監察御史轉禮科兵科給事中嘉  
慶初累擢通政司參議太僕寺少卿通政司副使  
嘉慶二年五月十二日卒年五十六君少以孝弟  
稱於家及在官恪敬吏事在中書嘗值軍機處在



刑部總辦秋審皆躬任勞苦不急求人知所建議  
皆當理及居科道奏議多可稱奉 命巡視南城  
屢監鄉會試於事皆辦其暮年承 命巡視南漕  
尤有績善撫卹運丁寬嚴有體於是漕船之行倍  
速於往年 純皇帝甚嘉之故君未及復命而

再遷卿職將遂更大用之也而君入京師居通政  
甫半年卒天下是以惜其才之不盡也君於乾隆  
丁未科會試癸丑科武會試皆爲同考官號爲得  
士其生平邃於文章之事中年自號葑亭所著古  
文曰葑亭集六卷議論正大敘事有法近時爲古  
文之善者推歛編修程魚門而君頗似之當乾隆  
之季京師士大夫奉廣惠寺僧爲師君惡之作一  
篇曰正師其後僧與奉之者皆得罪而君之名益  
彰其詩爲雙佩齋集六卷又金陵雜詠百餘首新

警有韻皆可誦也余在京師時君官中書將與相知未及而君以事歸江南使程魚門致意於余余爲題其觀雲圖及君入而余已歸余之江甯書院至君家而君仕京師以至沒不得見見君文筆誦歎而已夫人潘氏生子三太學生行恕貢生麟生候選府通判鳳生女六側室李氏生女一始君考平陽公自婺源僑居江甯生君故君少爲上元學生以是入仕旣仕乃復請改歸籍婺源及喪歸以婺源山水峻遠難以還柩君子乃葬君於江甯之而請鼎爲之銘銘曰

君度委蛇而正妄邪著緒有嘉年近才多未竟厥爲卷有遺文悠哉雅馴卓出俗羣貌不識君藹焉如親山水清善秣陵之坂故鄉雖遠子孫式衍式居式展

贈文林郎鎮安縣知縣婺源黃君墓誌銘并

序

婺源之黃邨有孝子曰黃君獎字譽侯君之祖曰  
大琪考曰鴻其祖以上蓋嘗富矣至其考而大落  
兄弟皆無以生遠爲幕客於蜀中去時君數歲十  
餘年不通問君冠乃走蜀求其父備經艱困得見  
於重慶父已病風痺矣君乃於重慶一石崖中居  
以課童子爲養踰年父終無資不能以喪歸始其  
父募得巴縣江北地爲義圩及沒君遂葬之於巴  
成塚立碑而去依其世父未幾其世父亦死君自  
是流離漂泊於川東西無不至嘗於峨眉重嶺中  
值大雪迷道入無人地飢不能行自分必死忽一  
丈夫至予之菽麥餅數枚曰竟此可以至通路矣  
由是得生遇歛商謝氏素知君孝延爲童子師卒

從謝氏得東下江南至蕪湖而時年已六十矣始  
娶婦於蕪湖顏氏而同歸婺源其母程孺人已前  
卒祖以下猶有耆功親六人未幾盡喪君拮据營  
其喪葬其妻顏孺人亦賢女與同居敝屋忍飢凍  
而樂爲善僅一子能讀矣則課之甚嚴如是十餘  
年子輝以拔貢生入都廷試 特命爲陝西知縣  
遂以鎮安縣知縣 覃恩封君及顏孺人輝乃請  
養以歸歸後又三年爲乾隆四十七年七月二十  
八日君卒年九十有六又後二十一年爲嘉慶八  
年正月十九日顏孺人卒年八十有六嗟乎如君  
生平所遭困厄且數十年使竟隕喪或雖不死而  
無後則世亦無由知君矣而卒於衰老之後得妻  
子身上壽終者天之欲表潛德也夫天且重之  
而況人乎君子輝以 年 月 日葬君

姚鼎爲之銘銘曰

陟山沂水求親萬里以瀕於死身危家圯茹荼若醴卒以有子升爲命士述之可唏揚之無旣

光祿少卿沈君墓誌銘并序

秀水沈君諱琳其字潤輝而交遊皆稱其號曰沈華坪乾隆三十一年鼎試職兵部其時君與上元陳中丞步瀛先在兵部三人相得甚歡入治公事出復談讌或抵夜而後散君爲人通明于事善談謔與人言無不盡聽者欣喜然所存厚有行誼惟習於君者知之余在兵部年餘移禮部後七年以疾歸而陳中丞出爲知府後仕至貴州巡撫惟君居京師久仕至光祿少卿卒時陳中丞適爲安徽布政使告余喪君而泣君也又後十餘年君子方大爲余邑令其時君已葬矣請補爲銘嗚呼余

老疾幸未卽死而海內故人零落至盡追思多可悲者往在江甯旣爲陳中丞墓銘矣然則君雖先葬而其平生行事宜見於余文亦其理也君祖諱光裕考諱雍嘉皆贈光祿少卿君成乾隆二十六年辛巳恩科進士歷官武庫司主事武選司員外郎郎中江南道監察御史吏科給事中光祿少卿皆有聲其使任嘗監督兵部馬館丁酉科監順天試辛丑科監會試巡視乾隆四十八年南漕皆辦於所職公私情理皆協事父母孝謹篤於親黨交遊先世嘗富矣至君貧而供養施助之事猶豐也有文學兼通醫見病者雖臧獲必盡心爲處方卒年五十八乾隆之五十一年也葬于

夫人

王氏子一女四銘曰

有才卓警久居臺省優寬絀猛其蹟載炳秀州東

境桑苑覆頌光祿之井吾銘炯炯以鞏幽靖

中憲大夫雲南臨安府知府丹徒王君墓誌

銘并序

君諱文治字禹卿丹徒人自少以文章書法稱於天下中乾隆三十五年一甲三名進士授編修爲壬午科順天鄉試同考官癸未科會試同考官其年御試翰林第一擢侍讀署日講官旋命爲雲南臨安府知府數年以屬吏事鐫級去任其後當復職矣而君厭吏事遂不復就官高宗南

巡至錢塘僧寺見君書碑大賞愛之內廷臣有告君招君出者君亦不應君之歸也買僮教之度曲行無遠近必以歌伶一部自隨其辨論音樂窮極幽渺客至君家張樂共聽窮朝暮不倦海內求君書者歲有餽遺率費於聲伎人或諫之不聽其自

喜顧彌甚也然至客去樂散默然禪定夜坐脅未嘗至席持佛戒日食蔬果而已如是數十年其用意不易測如此君少嘗渡海至琉球琉球人傳寶其翰墨爲文尚瑰麗至老歸於平淡其詩與書尤能盡古今之變而自成體君嘗自言吾詩字皆禪理也余與君相知旣久嘉慶三年秋過丹徒訪君君邀之涉江風雨中登焦山東昇閣臨望滄海邈然言蟬蛻萬物無生之理自是不復見君今君

來訃以嘉慶七年四月二十六日跌坐室中逝矣妻女子孫來訣不爲動容問身後事不答然則君殆莊生所謂遊方之外與造物爲人者耶著作文藝雖工妙特君寄迹而已況其於伎樂遊戲之事乎君年七十二夫人黃氏生子槐慶女四壻曰溧陽狄 丹徒陳 商邱陳杲長洲宋懋祁孫男六



將葬君

鼎爲之銘以代送窆鼎爲王氏秀山

阡表具君世矣故不復述銘曰

茫乎其來何從乎芴乎其往何終乎嗟吾禹卿乎  
生而燕樂與世同乎名表於翰墨之叢乎骨蛻於  
黃壤之宮乎脩乎寥乎憑日月之光而遊天地之  
鴻蒙乎

中憲大夫松太兵備道章君墓誌銘并序

君諱攀桂字華國一字淮樹先世自建州浦城數  
遷而居桐城十餘世至君祖諱紹七考諱天祐皆  
以君貴贈中憲大夫君歷仕甘肅渭源知縣武威  
知縣江南鎮江府知府江甯府知府蘇松督糧道  
松太兵備道其在甘肅年甫三十強果任事獲久  
逋巨盜總督特奏其功引見

純皇帝甚器之

命擢同知總督未及擢

上已特命知鎮江府

旋以才優調首府君博知天下利病所益官興廢  
多得宜而尤明於地形勢

純皇帝屢南巡狩

始皆自鎮江陸行至江甯

詔改通水道大吏

使君相視衆初謂昔吳陳黜鑿句容破岡瀆下達  
毗陵六朝因之隋始廢今可復也君往來察之以  
爲句容茅山岡石巨勢高鑿之極難縱成瀆非聞  
不可儲水其勞費無已不若從上元東北攝山下  
鑿金烏珠刀鎗河故道以達丹徒工力省而後修  
易可永爲利大吏如君議上奏令君監修君鑿瀆  
百里旣成謂之新河 御舟行甚安而數十年至  
今商民率避大江之險行新河君之力也 純  
皇帝嘉其能故君方以糧道被吏議而 上巡  
至卽以松太授君君好士獎善樂施予自鎮江江  
甯及至松江興理書院撫恤嫠困人多賴之乾隆

五十年安徽大眚桐城尤甚君時在松太聞之出  
萬金以救飢者又以糴穀以賑必驟長市價乃先  
於他處購山芋玉米數千石運至所全活無數既  
而又爲疫死者葬埋君平生惠閭里族黨之事甚  
多而茲其最巨其時君妣黃太恭人里居哀飢者  
多所救恤君迎養不肯往遂請告歸太恭人時健  
甚然逾年遂卒人謂早去官而獲送終亦其孝也  
自是君不復仕或居里或居金陵居金陵時彙主  
鍾山書院錢塘袁子才於金陵城中作園林甚盛  
麗丹徒王禹卿時來遊與君皆有聲伎二君每召  
聚賓客遊讌彙亦與焉然君及禹卿皆內耽禪悅  
事佛甚精子才時譏之二君不以易也六七年間  
子才先亡彙歸俄聞禹卿喪今又失君矣余悵然  
寂處追思昔遊一往真如夢幻然則二君之歸心

釋氏庸爲過乎君卒於金陵豫剋期辭交好以嘉  
慶八年十二月二日卒年六十八嘉慶十年六月  
日葬於懷甯西馬鞍山之北麓夫人先後皆吳  
氏子維極候補知府維桓乾隆己亥科舉人兵部  
武選員外郎女二孫四子才禹卿之卒彛皆銘其  
葬矣今君子請銘誼不可辭銘曰  
趨世工而建有功植財豐而能濟窮生也憂樂與  
世同超然一往遊虛空書其可稱以飭終寥乎趣  
嚮誰能窮

蘇獻之墓誌銘并序

常熟蘇君去疾字獻之桐城姚鼐同年友也孤清  
峻立以古人道持身衡於世知不行年四十四去  
官自號曰園公處場圃觀山水作文章自娛尤工  
爲詩標舉性情引擗幽渺斲雕藏耀人初視若無

足賞再三往復則爲之欣忭悽愴不能自己乾隆  
五十五年冬君訪友於安慶鼎與遇於江津舟中  
各出其詩相示分持而去自是十五年不見嘉慶  
十年正月君卒於里次年八月日葬於常熟西  
山父墓之側君子來告請鼎爲銘之君曾祖翔鳳  
康熙壬戌科進士沂水知縣祖佑昌平州同知贈  
興化府知府考直言贈內閣中書君於乾隆己卯  
科中順天鄉試辛巳恩科取爲內閣中書考得  
贈官癸未科成進士改庶吉士散館改刑部廣西  
司主事發貴州爲直隸知州署都勻府入寨同知  
以逸獄囚罷官次年引見以原官起用君請疾  
遂不復仕其狀小身短視訥言然曾中通貫今古  
於事理無不曉敢爲介直辭在刑部屢爭疑獄當  
安南黎氏爲阮氏逼篡仁和孫相國文靖公士毅

爲兩廣總督將討之君於文靖姻也與之書曰虛聲不可以讐強悍鄉鄰有鬪雖閉戶可也取之是爲貪兵發難有端將爲吾患不可不念文靖迂其說然竟以喪師身幾不免乃悔棄君語大臣間亦知君才者而君不樂與俗伍閒應其招嘗爲山西河南書院山長旋歸以老年七十有八而終有詩集六卷制義律賦二卷已雕板古文數十首藏於家夫人錢氏處士周和女前卒生三子汝詔監生載漳浦縣丞采廩膳生一女適大理寺評事孫輿文靖子也側室魏氏生女尚幼有孫十一人銘曰嗚呼園公有道植躬仕而不見通有文閱崇視於世而不見工吾銘其幽宮邪以待後世之無窮邪有知而如見其中邪

浮梁知縣黃君墓誌銘并序

君諱繩先字正木黃氏鄞人也唐未有江夏侯晟以禦盜功爲明州刺史其後屢有聞人於鄞閱二十九世爲君祖曰振齡考曰起忠皆贈文林郎君以鄞學生中乾隆十七年恩科鄉試成乾隆二十二年進士發爲江西知縣任樂平浮梁兩縣勤事致疾告歸數月以乾隆三十年九月九日卒於鄞年四十七葬於東湖陳墅塋父墓左君在江西九年天性仁明強力於政事未明起閱文書定晨召吏卽發有訟者至當鞠或當往驗視皆不越旬日坐堂上決事日或十餘案卽作判詞自讀與訟者聽之幕友書吏無從留閣以取市與囚言廢屏刑器嘗以至情動之而囚自服有豐城民余上文之弟爲浮梁人毆死藏其屍訟二十年不決上文乃走候大駕出陳告事下大吏欲第論上文

驚蹕罪君銳意治其寃自往履毆所於民宅後試掘卽得其弟屍獄遂定嘗謂事糺亂者非必難察由吏不盡心情翫致也故君所斷本治及上官委治他縣事百數無不曲當而積勞亦深瘡不可痊矣其所去縣民必涕淚送之數十里浮梁爲之立碑其後浮梁民有爲後令屈抑者走浙江將訴於君至則君已喪乃悲痛而去夫人張氏生子五定字定文定衡定樞定杓定文今爲揚州府同知與桐城姚鼎遇於金陵請補爲君誌時嘉慶十一年距君亡四十年矣銘曰

萬姓委命君則真令煩祛亂靖人安己病嗚呼天不與以齒其貽以後慶

贈光祿寺少卿甯化伊君墓誌銘并序

君諱爲臯字景陵汀州府甯化伊氏以孫廷棟貴



得贈朝議大夫光祿寺少卿君生而勤志力學欲  
有聞於當世然於時衡才者無所遇伏處甯化城  
中以奮以鬱康熙五十九年五月九日卒年五十  
三矣卒後八年而廷棟始生長而讀其書經君點  
勘丹鉛之蹟縱橫斑駁行間者千餘卷也撰著文  
字手書精楷黍粟積成巨冊者尺餘也其家傳至  
今悲之君考順昌縣訓導鄉飲大賓諱應聚長者  
也君又長者也其家始稍裕而卒大貧有姻族欲  
假人千金求君爲說之旣得遂不償君大媿鬻產  
以償債者故困君娶黃氏生子經邦爲諸生生二  
子長廷棟乾隆己丑科進士光祿寺卿生二子長  
秉綬乾隆己酉科進士今揚州府知府光祿在石  
州以君葬昔闕志俾秉綬求追爲之嘉慶十二年  
太歲丁卯正月銘曰

守信不衰利則棄篤學不怠名則翳卒有褒聞生則蹶日月逾往將百歲述德簡辭足知義桐城姚鼎作諭志

封文林郎巫山縣知縣金壇段君墓誌銘并

序

君諱世續字莘得金壇段氏祖諱武父諱文及君二世世皆爲金壇縣學生金壇自明以來爲海內制義名家之藪至君考及君皆善其事君尤爲學使者所賞貴而皆不遇於舉場終身以訓生徒爲事其訓必使以讀經爲根本與講授熟復之唯恐有弗達也朝夕課之多方以誘之唯恐己力之餘而弗致也其後學徒多成立而君子玉裁遂以經學名天下者君之教也君三十二而孤至八十九歲矣思至則悲哭博陵尹學使會一嘗召諸生與言

志君曰生無能惟願不忘父母而已君以恩貢  
入太學以玉裁爲巫山知縣得封職年七十而玉  
裁歸養自金壇移居吳閶門之外于是又二十餘  
年君嘗步遊郊野或至十里之遠而獨未嘗入蘇  
州城其遇人無貴賤長幼率怡如也年九十而見  
元孫嘉慶五年吏上於朝賜扁曰七葉衍祥又  
賜銀幣嘉慶八年六月十四日年九十四而終  
君娶史孺人生玉裁乾隆庚辰科舉人巫山縣知  
縣玉成丙午科舉人桐城訓導玉章貢生玉立副  
榜貢生女一適江都杜士彬孺人亡繼娶錢孺人  
無出亦先君喪孫七曾孫十二元孫二君之卒自  
吳已返葬金壇治西大壩頭銘未具嘉慶十二年  
姚鼎追爲之銘曰

篤於慕親宜有後也忠於訓人宜繼道也和於治

身宜康以壽也歸娶故鄉藏斯寶也銘之以信用  
貽遠宙也

中議大夫太僕寺卿戴公墓誌銘并序

嘉慶十一年五月甲午故太僕寺卿揚州梅花書  
院山長長興戴公卒於書院喪歸湖州次年其子  
以公行狀求桐城姚鼐爲公墓銘鼐與公皆乾隆  
二十八年癸未科進士也是年成進士爲京朝官  
者蓋六十人而浙江最勝逾二十人長興戴公在  
工部時浙江有二戴以公年少羣呼曰小戴公每  
同年聚會鼐見公溫溫寡言說而謙謹讓人知爲  
長者也其後十年仕京朝者或出或死亡鼐以病  
歸留者十餘人而已鼐旣歸三十餘年又加少其  
未歲在朝者三皆浙江人也錢塘費相國淳富陽  
董相國誥及公是已旣而聞公去又聞其亡迄今

同年生合計內外朝野不過五六人而籍最爲篤老焉昔鄭康成以比牒并名者爲宰相而已樂論贊之功有日西方暮之嘆余之無聞安敢比於康成而草澤之中犬馬之齒未盡彌見同年之摧喪則感又有逾於鄭公者是可悲也公諱璐字敏夫曾祖諱容贈通議大夫祖諱永椿雍正癸卯科進士江蘇按察使考諱文燈乾隆丁丑科進士禮部儀制司員外郎公所歷官自工部都水司主事再擢至郎中遷湖廣道御史禮科吏科給事中鴻臚光祿太常三寺少卿通政副使太僕寺卿嘗爲乾隆甲午科廣西鄉試考官充 文淵閣詳校官其爲人謹飭奉職不求苟表異爲聲名以資平進至二三品而家常窶乏諸子遊幕乃得爲生終不爲取贏計故年六十有八而客歿於揚州茲其可述者

矣夫人沈氏子錫衡崧申鼎恆鼎恆嘉慶戊午科  
舉人女四孫三銘曰

德有常進有方至九卿無辱行承世祥能文章貽  
後生遠不亡歸娶牆於此藏

新城陳君墓誌銘并序

君諱吉冠字嘉甫新城陳凝齋先生道之第十三  
孫而薊莊孝廉守譽之長子也才雋好學少而篤  
慎未嘗有子弟之過爲文英異出疇類中乾隆五  
十四年江西鄉試後遭母吳夫人喪哀毀甚旋感  
疾卒於乾隆五十八年十一月朔日年二十七妻  
楊氏二十七爲婺三子曰效曾敷曾敬曾凝齋先  
生之門多賢之門也余於凝齋先生及其子孫大  
抵識之獨未見薊莊父子以書通而已而於嘉甫  
甫知其才旋聞其喪茲可悲也嘉甫工書法尤善

八分余得見其所書文字數種勁厚有韻非常人  
所能逮薊莊旣痛子亡乃盡取其書刻於石厝於  
一室陳其生平所好凡硯書策於室內薊莊每往  
徘徊及暮慟而返如是者數年嗟乎觀薊莊所以  
思其子不能忘者如此其子賢可知也今薊莊葬  
於 所余哀而爲之銘曰  
家有則承以克維俊特天才騫藝有妍奪厥年藏  
之厚銘之壽宜昌後

中憲大夫陳州府知府陳君墓誌銘并序

君陳氏諱守詒字仲牧世爲江西建昌府新城人  
君祖以汧以富而好施稱於江西自是累世皆然  
其居中田邨故天下稱中田陳氏君考諱道乾隆  
戊辰科進士不仕而篤學植行於家世稱凝齋先  
生君爲凝齋第二子其人勇于爲善嘗首出財建

立義倉於所近邨落春借秋收至今民賴其賜在京師買宅立爲新城會館乾隆五十二年甘肅官以冒賑事多被戮其家屬不得返君出金使人至甘肅爲贖罪且助使返至於朋友急難之誼尤厚嘗分宅以居鉛山蔣編修士銓君少擁先世遺財屢費至暮年遂竭盡矣遇事有所欲施而力不供輒咨嗟不樂蓋急於濟人者固承其家風使然而亦君天性也君仕爲兵部武選司員外郎車駕司郎中安徽太平府知府河南陳州府知府其在官與人誠信慈惠猶鄉里然凝齋凡五子余識其二其一君兄金衢嚴道其一君也金衢朗亮疏達而君恂謹皆君子人也君守太平時彛居安慶書院君來訪自是相知及君自陳州告歸余尚在安慶送君江上別九年而君以嘉慶十四年十一月甲



子卒於里年七十八昔金衢最早喪而其後今多  
貴顯君生亦未及盡君志天固昌其後世使大成  
君志歟君夫人魯氏封恭人前卒生子二舉人光  
祿寺署正煦嘉慶辛酉科進士翰林院編修文淵  
閣校理用光側室胡氏生甯州知州繼光方氏生  
璿光湯氏生瑾光君沒時有孫十人某年月日君  
子葬君於      以書來請爲銘銘曰  
仁人之族固靡暴也愉懿有士其可好也親賢樂  
義鞠無告也不擁其貲施以好也衆欲其存耆未  
耄也鬱其餘慶篋久報也



惜抱軒文後集八

墓誌銘二

通奉大夫四川布政使姚公墓誌銘并序

公諱令儀字心嘉別字一如先世自浙江遷婁縣  
曾祖諱天麟祖諱士英考諱宗侃三世皆以公貴  
贈通奉大夫四川布政使公少爲松江府學生乾  
隆四十二年爲選拔貢生次年朝考一等引見

以知縣用發往雲南至則攝祿豐縣事值易門缺  
官上官令並攝事皆辦改署尋甸州總督誠嘉毅  
勇公福康安見公所爲賢之時四川有亂民爲之  
福公移督四川乃奏以公從幕府其後繼福公爲  
督者李公世傑孫公士毅皆知公賢俾令健爲仁  
壽晉石砭同知又從將軍鄂輝進討西藏廓爾喀  
兵行人迹不至之地近寒巖谷之中爲儲峙供頓

皆辦鄂公木四川總督也以罪降而孫公士毅復  
爲總督福公 大將軍同征西藏而異路皆以書  
招公公以旣許鄂公從之不去而任事彌力

上聞亦義公乃

賜花翎旋擢雅州府知府及功

竣又調成都府知府其後川東湖廣苗民爲亂福  
大將軍又往征檄公至軍初福公以公於西藏之  
行不就其招爲愠也旣而意解及征苗軍中事率  
與公謀公言無不盡屢有功矣會大將軍輿人毆  
都司徐某於營門裂其衣公叱止之不聽公乃擒  
杖之一夕死大將軍頗憾抑其勞不進官其時大  
將軍從人暴橫甚軍中皆倚公爲重公旋以勞疾  
請假而大將軍亦薨於軍其後四川達州白蓮教  
復爲亂及威勤侯勒保爲總督又檄公入幕當嘉  
慶二年三年與賊連戰公皆與謀畫以戰捷所獲

俘囚公承鞠其無罪獲釋者不可勝數威勤公旋被逮其時公晉官四川鹽茶道矣而未之任乃護送威勤公入都旋釋罪又與偕返而威勤復權總督事其時數大帥相峙公皆與相知于間勸以和一言甚忠盡諸帥多聽功成寇殄四川以甯嘉慶六年公乃涖鹽茶道任逾四年擢四川按察使次年擢布政使公生平在軍中時爲多臨民時雖淺輒有績當爲縣令善平獄訟方孫公士毅爲督禁民間小錢法峻幾廢市公乃急發倉穀令以小錢若干易米若干錢收而民靖孫公大善之令各屬以爲法其知成都府歲侵請發倉粟大吏持不可公身任請必償卒以濟民每冬月設粥廠以食餓者及春逮爲監司令各郡行其法至今四川賴其賜其爲按察使也數月清釐積案六百餘事然亦

積勞自居軍中已常失血暮年遂亟嘉慶十四年十一月癸未卒於成都年五十六夫人許氏生子二椿樾皆諸生公持身廉而厚施於族黨故舊少能文工爲書至老不倦於學嘗謂鼎知爲文以書交使其子論學就鼎然未及見公而聞公喪矣其子扶柩歸葬嘉慶十六年十一月甲申窆於青浦縣三十八保一區二十八圖罔字圩鼎爲之銘曰愉愉有文侃侃其武不辭險艱不憚疆禦內靖外襄不以功詡柔撫勞民作藩西圉不竟厥緒銘告來許

資政大夫光祿寺卿加二級甯化伊公墓誌

銘并序

公諱朝棟字用侯汀州府甯化伊氏也當雍正乾隆之間甯化有雷副都御史鉉陰先生承方以朱

子之學講於里中勸教學者公少以二人爲師友故其生平言語動作不苟而於取舍進退常有以自守也以拔貢生中乾隆二十四年己卯科鄉試己丑科成進士其間嘗處極困將會試而無資邑令方重公有富子被逮請公一言解之而酬百金公執必不可旣成進士分試刑部補安徽司主事諸城劉文正公最賢公欲薦舉而文正歿其後歷員外郎郎中皆計俸須次而僅得之公治曹事甚勤恪不求人知獄有不平必與同僚上官力爭之人或說或不而公不爲易故自分發刑部二十年乃擢浙江道御史爲御史一年轉戶科給事中嘗奏對

純皇帝知其賢於是五轉至光祿寺卿且將重用之而公遽病偏枯以乾隆五十七年去職年六十有五矣是時公長子秉綬以進士爲

刑部主事於是 予告養病於京師又逾二年爲  
嘉慶元年扶掖以與公卿千叟之宴其後秉綬知  
惠州府公從至惠州當是時嶺南多姦民歸善博  
羅屢有爲逆者而提督標兵反與通謀大吏特諱  
言之也秉綬旣以先事請兵靖亂觸總督吉慶之  
怒劾戍矣而亂黨遂起公以謂子之屈可以不伸  
而嶺南官弁縱賊及兵與賊通之患不可不詰身  
嘗爲侍臣不敢隱草疏將奏之會後總督倭什布  
至聞吏民所論皆同公言乃頗奏陳其當得罪者  
而秉綬因以得釋後爲揚州知府公從至揚州以  
嘉慶十二年八月六日卒於揚州官舍年七十九  
公事親孝居喪盡其哀相國蔡文恭公嘗曰居貧  
實樂居喪實憂者吾見伊君而已自少好讀書旣  
病去官作南窗叢書多發先儒疑義其爲詩尤有



高韻逸氣曰賜硯齋集四卷夫人羅氏二子秉綬  
秉徽始公爲刑部主事彙爲刑部郎直四庫館與  
公未及相知後乃知公子秉綬公喪將歸葬乃先  
爲墓誌以授其子公家世俱詳彙所爲公祖贈光  
祿誌中矣故不復出云銘曰  
居約有恥旣貴靡肆葆茲常度淵乎君子其道有  
承其學有嗣其歿無憾安宅桑梓

禮部員外郎懷甯汪君墓誌銘并序

禮部員外郎汪君於嘉慶十三年十月八日卒於  
京師次年其孤浦奉柩歸葬於懷甯先以書請余  
爲之銘嗚呼學之敝甚矣世俗說經者不務講明  
服習聖道行天下之公是而求一己之私名搜取  
隱僻爲異而不必其中辨晰瑣碎爲博而不必其  
當好惡黨讎乖隔錯迕是失聖人所以作經之本

意而以博聞強識滋其非者也君少稟承宋儒之  
言行己有恥其於經也辭義訓詁之小者未嘗一  
一拘守程朱而大義必宗嚮而信且好焉因推明  
其旨將以扶正道率後賢是可謂君子之爲學矣  
余始未識君居懷甯敬敷書院時君來偶見余說  
詩關雎言古序及毛傳皆同朱子之說謂爲后妃  
求賢作者鄭康成一人之誤說耳君因探懷出所  
著說則意正同余自是往來益密其後君去入京  
師中乾隆五十三年順天舉人嘉慶元年成進士  
選庶吉士告歸又一見其後君改官禮部主事擢  
員外郎以公事被議旋復待缺遂卒君所讀經皆  
有札記其子編之爲八卷君年僅五十餘所欲爲  
者非第如今八卷也君深識天下事利病遇義慷  
慨敢爲使端行一方施於政事亦當有可觀者惜

其仕與學皆未竟而身沒矣君諱德鉞字崇義祖  
諱周煜父諱文輝娶徐氏繼娶阮氏子三時浦時  
漣時泰孫 銘曰  
篤行好學義之徒志遠事鬱失士模後百千歲敬  
厥墟沐樽中瘞非俗儒

誥贈中憲大夫刑部員外郎加三級瀘溪縣  
教諭楊府君墓誌銘并序

君諱芳字仲簾先世撫州臨川楊氏自臨川遷金  
谿居鵝塘里累世皆以學行為儒而率終於諸生  
曾祖諱遴祖諱曰遷考諱毓淇君生幼而三世皆  
喪惟曾祖差晚撫教君至十歲而已君於危孑孤  
處之中矯能自立一日發父遺書慨然涕泣思究  
學乃窮日夜治諸經悉通其義遂為諸生雍正乙

卯科乾隆癸酉科再以五經為鄉試副榜貢生君

生平手鈔五經至四五通而寡著述曰士貴於經所云行與副耳若傳註則前儒備矣故其處家盡孝弟之誠雖貧不較於財雖勞不表於衆其持身能極儉約故能介然無求而室家安之於交朋友誨弟子必以誠信士羣推其文行矣而終屈於有司乃選瀘溪縣教諭君在瀘溪以身訓士尤以敦倫紀惜廉恥勤職業爲亟非公事未嘗謁令亦不輕受人謁士有見枉則告於令直之其人來謝卒不見文廟敝君勸修於瀘溪瀘溪人素重君聞君言皆應值積兩竈無薪治廟材者或束木梯以遺君君拒不許至今瀘溪人言官于彼者曰如楊學官乃君子已君之瀘溪年七十矣數年遂歸歸五年以乾隆五十二年十二月望卒於里年八十未沒時以子護貴封奉直大夫刑部主事加一級卒

後贈中憲大夫刑部員外郎加三級夫人同縣李  
氏生庠生韶繼配同縣聶氏生乾隆甲辰科進士  
江甯布政使護乾隆辛卯科舉人猷皆贈太恭人  
李太恭人先君卒已別葬聶太恭人君卒後二年  
卒年 十 其爲人慈仁恭儉甘貧善承君志愛  
韶甚於己出之子嘉慶 年 月 日葬君於  
秉義嚴飭誦經行則內行靡忒善羣而貞不忤而  
清君子之能德充仕狹閭無著業光闡嗣葉有配  
仁厚偕厥老壽同藏茲阜

舉人議敘知縣長洲彭君墓誌銘并序

君諱希韓字玉擎長洲彭氏自順治丁亥科進士  
長甯知縣瓏生翰林院侍講定求侍講生鄉飲大  
賓正乾大賓生兵部尚書啓豐侍講於康熙丙辰

科尚書於雍正丁未科皆以會試殿試頻第一名授修撰故天下稱盛族必曰彭氏自大賓以上四世皆贈如尚書官尚書長子爲舉人曹州府桃源同知紹謙而君又桃源之長子也昔侍講撰儒門法語以教子弟爲修士而君幼尤端謹明惠能讀先人之書尚書以爲喜乾隆乙酉科中江南鄉試舉人時君考已仕山東爲令君往來官舍奉侍之暇偶言商政事必當理君考旋以卓薦升曹州府桃源同知未之任省親乞歸歸六年卒其時尚書里居尚健也君治喪事旣閒則奉大父惟謹其後值乾隆四十五年

純皇帝南巡蘇州紳士

建迎

鑾亭館二處君以尚書命任其事甚修備

其年尚書入都祝

釐及返君皆侍焉四十九年

又值

南巡蘇州當有修建計費頗廣於前衆欲

以畝派君曰蘇賦固重矣紳士迎 鑿紀 恩而

費及小民不可吾曹捐之慎用無糜可也衆曰善  
初君嘗爲四庫館謄錄旣竣功議敘當得分發知  
縣矣以尚書春秋高不欲離故未就是年夏尚書  
遂捐館君以冢孫視疾及喪皆如禮然君傷甚自  
是亦病遂里居不復出卒於嘉慶十一年十月四  
日年六十二君爲人誠厚端凝而明敏於事有就  
謀者語之必盡其道任之必盡其力輯宋以來儒  
者之說時取自省曰退齋日錄君叔父紹升以開  
敏堅卓之資融合儒釋爲義世所稱二林先生也  
君自幼與同塾讀書中歲講論皆資受其益而君  
持論終守家法不渝所謂善學柳下惠者與君工  
文善楷書暮年旣病終日危坐讀書如常時以迄  
於卒娶顧孺人生澧州石門知縣蘊琨繼娶吳孺

人生女一再繼娶孔孺人生候補縣丞蘊琳庠生  
蘊燦女二以嘉慶十年月日葬君吳縣太  
平鄉梅灣山麓桐城姚鼎爲之銘曰  
植行篤養志卓才可遠服施一躬葆厥澹邈靡不  
足繼前修躅遺後福藏君茲寶鞏且隩

中憲大夫順德府知府王君墓誌銘并序

君諱廷言字顧亭婺源王氏平陽府同知諱文德  
之子候選縣丞諱士鏡之孫兩世皆贈中憲大夫  
君才通曉世事而性清遠喜文章耽禪悅嘗仕爲  
河曲州知州矣又晉順德府知府矣兩地皆有政  
聲名跡而在順德值歲饑君於公帑振救之外又  
自出財以施貸所全者甚衆上官尤稱之以爲賢  
將更薦舉而君以目疾不痊遂請告去官君始家  
婺源之漳溪遷居饒州旣乃定居於江甯之西南



郊故於江甯婺源事有當爲利民者君皆以鄉里之誼任焉立積倉興文社今入婺源塗中有溪橋數處皆君建也君兩弟工部員外郎廷亨通政副使友亮皆先卒而君獨壽嘉慶元年入都與皇極殿千叟之宴賜綺鳩杖自是歸不復出鼎來

江甯與君知十餘年其家有樓臨江上置積卷每凜秋氣霽要余登之眺臨空曠爲說無生之義其平居禪誦之餘吟咏而已尤喜余詩多能舉其辭而余或自忘也所著有自娛草若干卷嘉慶十二年正月四日卒年八十三娶江恭人無出繼娶戴恭人生子二長候選主事汝成先君卒次候選中書舍人芝祥女五君夙愛饒州之山命

必葬是以嘉慶十年 月 日葬鼎爲銘曰

婺源重巖黝歛之南王氏徂居自宋祕監數十其

世衣冠庸繼君才卓興北遷江裔秉持符竹布惠  
熒獨養志懸車邈焉高躅里懷其厚曰俊以壽藏  
棺茲阜銘貽無朽

朝議大夫臨安府知府江君墓誌銘并序

君諱濬源字岷兩懷甯江氏曾祖諱守侗祖諱汝  
湛考諱嘉椿祖考皆以君貴贈朝議大夫君以縣  
學生中乾隆三十五年舉人四十三年成進士授  
考功司主事晉員外郎又晉稽勳司郎中兼考功  
事君在考功十餘年貨賂不敢及門吏不敢爲姦  
弊乾隆五十八年出爲雲南臨安府知府臨安邊  
遠民寡知義君一以道理諭之訟者至君呼至案  
與言如鄉里至不可教乃威以法有兄弟以財訟  
者君爲言骨肉之誼其辭痛甚言未終訟者泣涕  
求罷訟復於好後訟者益稀臨安所屬夷氓土司

十掌塞十五舊土官謁知府其儀嚴甚知府坐堂  
上如神堦下跪拜惶迫不聞一言而出君獨接以  
和易賜坐與問夷情具悉土官感恩奉命愈謹而  
事大治居寡燕樂廚舍蕭然優人跡不至其郡而  
境內小大績無不舉縣皆立義學爲立法甚密任  
內公私修橋梁至五六十君自爲文以記臨安民  
以爲榮嘉慶二年貴州興義苗爲亂蹂近雲南君  
調士練防禦賊不得入境後二年君護迤南道值  
大兵勦猛猛土司君駐威遠督理防勦有功以卓  
異薦入都旣引見反臨安待陞君以年七十請  
致仕歸後五年爲嘉慶十三年九月辛巳卒於家  
君少工文章爲諸生時嘗事劉海峯先生聞古文  
法著介亭內外集十二卷介亭筆記十卷其在臨  
安澧社江六蓬渡有螞蝗之孽時覆人舟君爲文

祭神其夜大風雷鳴若有物隕墮祟竟滅人以配  
昌黎之告鱷云在威遠時作邊防四篇其言守邊  
利病尤具在考功時爲己酉科陝西鄉試正考官  
取士稱當焉娶胡恭人同里太學生熾女事寡姑  
趙太恭人最孝趙太恭人謂孫女作婦者宜效之  
又能以勤儉助夫爲廉嘉慶四年 月卒於臨安  
官舍年 十生七子甲寅科舉人彥和己酉科舉  
人景綸附監生郁才監生景綬候選縣丞甸附學  
生景紱廩生爾維君喪時有孫十六曾孫六嘉慶  
十五年 月葬君於縣西北四十里辜家沖山麓  
胡恭人附桐城姚鼎爲之銘銘曰  
講仁導義德被邊邇以及夷裔樹績佳吏內原儒  
藝有助賢嫺稱其翟芾爰安同瘞

吉州知州喻君墓誌銘并序

喻君諱寶忠字元甫祖曰懋達考曰世岸皆以君  
仕知縣贈文林郎先世爲建昌府新城縣人君考  
遷居南城矣子孫猶貫新城籍君自新城學生中  
乾隆二十四年江西鄉試三十一年成進士君先  
以大挑一等得知縣成進士後乃分發廣東所歷  
河源陵水石城翁源四縣署南澳同知化州知州  
事嶺外命案好爲詐僞吏每爲所罔君察傷泣獄  
能盡其聰明究其情曲又婉喻理義使之心服焉  
在石城值大旱災君首捐財市米且勸富民出賑  
設粥廠七每鄉民所出米卽賑其鄉不足則取於  
縣又爲平糶施醫藥棺槨之法甚詳民賴以濟是  
時君積勞數月而鬚白以卓異擢山西吉州知州  
未一年遂告歸時君年六十矣君少工文章在廣  
東四爲同考鄉試多得士及退歸衆推之主盱江

書院成益多才君之歸也居於南城嘉慶十一年  
卒於南城年八十二配鄭宜人前卒生子三宗衡  
縣增生崇緒國子監生皆卒崇勳乾隆乙亥科舉  
人爲安仁縣訓導側室陳氏生子三宗崙以縣學  
生舉優貢候選知縣宗嶠江蘇從九品宗嶧女九  
君卒時有孫十一曾孫二 年 月 日葬君  
於

銘曰

奉職能持己清文可稱壽旣登子若孫殷當興書  
藏期後必徵

朝議大夫戶部四川司員外郎加二級吳君

墓誌銘并序

君諱元念字在宮桐城吳氏曾祖諱子雲順治乙  
未進士河南提學按察司副使祖諱祖佑浙江安  
吉州知州父諱文炳候選州同知母馬太恭人生

六子而君爲長年二十餘而孤君撫諸弟成室治家有法不貪而殖君始仕得雲南建水州知州有善政有士官亡有子而其弟欲奪其襲位構訟弟以金置酒饗饋君君召兩造升堂開甕出金罰使修橋而斷以子襲鄰州有盜越境至爲君獲君以與其州官而不居其功數年擢戶部四川司員外郎二年告歸里居凡三十三年嘉慶八年正月乙未卒年八十君爲人長者訥言而和易里人多慶君其生平無妾媵居京師時以妻子侍母於里與姚鼐同賃一宅而分居之朝夕談無間鼐後君四年乃歸鼐自歸里多居書院不復與君長聚然時念君及君喪而鼐故人盡矣夫人左氏懷來知縣世壽女能佐君以成其志生子二候選訓導金榮監生承露女三孫九夫人卒於乾隆五十三年

月 日嘉慶九年三月 日合葬於縣治東南十里方莊之原鼎爲銘曰

質素寡競以簡居政民樂以幸懸車既定優游多慶年耄身竟其族方盛繩繩子姓有配維稱永偕  
幽篋

順天府南路同知張君墓誌銘并序

君諱曾份字安履桐城張氏祖諱廷 南川縣知

縣考諱桐萊州府知府君本諸生能文章而爲吏

勤明有斷所至民以便安始仕爲甯晉知縣遷南

皮皆有能績遷大興畿輔多貴人勢家君秉法請

託不得行尤著強幹名擢順天府南路同知其績

益起京師達官知其才將大起之而君以淀水漲

親往護文安隄自夏迄秋晝夜勞憊隄得固而君

得疾次年疾進以乾隆四十一年五月十五日卒



於官年四十五始君妣姚恭人姚鼎從曾祖姑也  
君娶姚宜人鼎從曾祖妹也當乾隆二十八九年  
鼎在京師君需次吏部與少詹事曾敞三人同居  
一卷日夕相對意密甚鼎遂以女許君幼子君後  
出仕爲縣復入爲大興其年少詹事罷官去君擢  
南路距都城三十里鼎與君相見猶數夫遠宦數  
千里而婚姻得相依近此人生不易遇可幸者也  
然鼎以乾隆四十年去京師次年卽聞君喪又次  
年而詹事亡君有二子長元輅爲廣西巡檢病歸  
次元輯以嗣君兄曾 次元輯鼎女婿也君沒後  
九年而喪吾女又無子悲夫人生倖得可快之事  
何其少而不幸可痛之事何其多也君始葬於縣  
治北山以有水泉之害嘉慶十年 月 日改葬  
君於 之原姚宜人祔鼎念君才優年絀不獲

大展於生前而沒後又多可悲者因銘以寄吾傷  
焉銘曰

殷哉畿輔難治自古矯矯強武卓不可侮遐矚長  
撫而中折殂天道何主孰昌孰隳孰抑孰阻擇是  
安土蕃祐厥後銘是魯祔其信其庶

知縣銜管石碑場鹽課大使事師君墓誌銘

并序

君諱問忠字恕先師氏本居山西洪洞明初從黔  
甯王定雲南以功得世襲指揮使者曰毓秀始居  
於滇其後乃有定居大理府 者至君凡七世

君之祖諱可植考諱行甫為縣學生君十四歲而  
孤孑立無伯叔昆弟貧以耕食欲奮於學而姿魯  
讀書不得入君愈發憤且求禱於神一夕寐若有  
人以刃剖曾取其心濯之寤悸猶若痛然自是聰

悟文冠其儕旋入縣學乾隆六年中雲南鄉試第一  
二名試於禮部數不利丙戌科試後挑晉甯州訓  
導四歲吏部取入都旋授爲長蘆樂亭縣石碑場  
鹽課大使於是居樂亭二十年乃歸歸居八年而  
卒年八十有五君有文學才識屈居下職然不以  
爲忤意遇人甚和易至非義則堅不可犯樂亭令  
以竈戶地誣爲荒地招姦民而市之竈戶訴於朝  
人知令之不直也而多爲之地者君以實報上官  
且持之甚力上官謂之強項場官然終以君議正  
不可奪也卒以地歸竈戶其持身儉甚衣履敝不  
易曰苟欲華侈一至不給則敗所守矣娶金孺人  
生子翼先君歿繼娶任孺人生子範君以文章教  
弟子多成名者而範亦中甲午科雲南鄉試第二  
名今爲安慶府望江知縣有聲矣天蓋報君於其

子也範已葬君使鼎補爲銘銘曰

其學天啓其行人躋官偃不起誼植弗毀昌後其  
俎旣安幽里銘貽萬祀

中憲大夫開歸陳許兵備道加按察使銜彭

公墓誌銘并序

公諱如幹字天培惠州陸豐彭氏也其考諱名史  
雍正壬子子科舉人登乾隆乙丑科明通榜爲江川  
縣知縣以公貴授中憲大夫生七子公第四兄弟  
從雲南官舍爲學精甚乾隆己卯科偕次兄如槐  
登廣東省鄉試榜公於丙戌科成進士而以榜前  
大挑二等得高州府教授遭憂服滿乃以甲次得  
汝甯府汝陽知縣公驟爲政卽明達多惠利以緝  
獲江南阜陽盜首引見詔以同知題補還治  
未及擢值新蔡縣民李釗爲亂圍城公率衆援之

賊駭散公佐上官追討親往麻城界捕獲盜首二人旋署陝州事捕盧氏姦民常禮繼擢南陽府同知上官謂同知雖尊於令而任則簡方賴公才治劇俾仍攝縣事公治縣益勤且惠民益欣之遂攝歸德府既而以監運糧引 見 命擢知府授汝

甯府當公在汝陽旣多惠政而營辦災賑所濟溥密民尤賴之故重至爲守衆皆喜而公亦樂爲之勞勩百務皆舉適值歲豐民皆謂公爲貽福云調開封府其治猶汝甯而以居首府雖異郡事時治及之所予奪輕重悉適當嘉慶之初湖廣亂民起連及河南開封設軍器餉運之局公督理無不備又嘗赴軍營值內鄉浙川有賊率兵往夜馳三百里賊不意悉爲禽得而後入城民始知官兵之至以是功奏 賞花翎息縣賊民張雲路爲逆有梁

國幹者素與相識而投公前願自效人謂是爲賊  
偵不可用宜殺之公曰觀其形辭非詐也待之厚  
卒禽雲路者國幹力也以是功 上令加道銜

而 頒御物賜之旋授開歸陳許道職兼理河事  
國家數十年內屢有河患矣而公在任三值焉  
嘉慶四年決儀昭數月而塞八年秋決祥符逾月  
而塞冬決衡家河其患最鉅逾半年乃塞天下所  
謂衡工也公皆在工所相視形勢之便籌思導塞  
之宜指麾畚揭之事不避風雨昏夜故功每易成  
卒以督辦衡工引河勞瘁致疾猶勤不輟以至於  
沒是爲嘉慶八年十一月二十四日享年七十事  
聞 詔謂公深悉河務實心任勞力疾不移致沒  
工次故 加恩賞給按察使銜異數也公持躬有  
節而厚於待族戚交遊天性明果而行以仁恕久

在河南稔其風土所舉必爲衆便賴旣亡公私皆  
慕思之夫人劉恭人繼配葉恭人皆先卒子十應  
焜應燕爲瑞州府知府應壽應杰候選員外郎應  
煦候選知縣應陽應勳應照應烺應煥葉恭人所  
生子六側室白氏生脈陽側室劉氏生應照以下  
三人也女三孫男八孫女四公之子以嶺南道險  
遠不能歸葬葬公於江甯之  
公墓焉爲嘉慶 年 月 日姚鼎適在江甯爲  
之銘曰

才勇德善理煩靖變姦亂息宴厥用未盡勤國身  
殞 天子惜閔其功在民其道可循子孫振振  
秣陵原土興伏龍虎宜爲藏所

贈朝議大夫戶部郎中福建臺灣縣知縣陶

君墓誌銘并序

君諱紹景字京山先世彭澤人也宋端平初有自彭澤官江甯者曰細三後遂居江甯東南鄉今謂之陶邨居陶邨若干世遷居城內者曰可能是爲君祖以君貴贈文林郎君考諱勳以君貴封文林郎又以孫敦仁貴贈奉政大夫君之少也以孝聞母疾割肱以療之而愈讀書勤苦逾人工文章以庠生中乾隆三年戊午科江南鄉試第一名閱數年不第選雲南大姚縣知縣調永善遭艱歸服闋補福建松溪知縣調臺灣其在雲南民風陋樸君專以德化有訟者反覆勸諭民輒悔改及至閩民詐狠健訟君乃嚴法繩之其邑亦治君在臺灣常署淡水同知皆有績以海疆任滿當擢官去臺灣民素戴君爲立碑頌然君經涉海洋之險厭吏事不待擢而遂告歸其在鄉里溫溫長者口未嘗稍



言人之過喜論文在雲南福建皆嘗爲同考官多得佳士又開設書院以啓其秀俊士皆賴其誘進焉君之歸也年四十餘優游閭巷復四十年又值戊午科乃重赴鹿鳴之宴世以爲盛事又逾二年爲嘉慶六年二月二十六日終於里年九十一夫人詹氏先卒子二保德州知州敦仁國學生敬修孫十人渙悅濟慎皆嘉慶丁卯科舉人君始以子得封奉政大夫保德州知州矣身後以渙悅爲戶部郎中得賍贈朝議焉嘉慶十五年與詹夫人合葬江甯安德門外林堂山麓桐城姚鼐爲之銘曰才俊之興君冠以稱出宰殊俗優優吏能其德無矜宜壽之增載貽後禔餘慶其徵



惜抱軒文後集九

墓誌銘三

抱犢山人李君墓誌銘并序

自劉海峯先生晚居縱楊以詩教後進桐城爲詩者大率稱海峯弟子然吾謂爲詩自有性情非其性情雖學不能善李君僊枝字寶樹遊海峯之門學其詩而似之孤介自喜爲縣諸生早棄去科舉學在家爲園池植竹樹自娛稍稍積錢卽出遊覽山水遠絕城市其性情真詩人矣乾隆五十八年余在江甯君忽至問所自來曰偶思洞庭及錢塘西湖因遊月餘塗間未嘗與人談話今將歸過此來見君耳因邀余至其家後余歸里以君居抱犢山去城猶百里餘未及往也而君旋卒卒後君從子宗傳述君意欲余志其墓余以君之可稱述者

如此因許銘之君祖熙載父光璐娶王氏卒於嘉慶元年三月十一日六十四歲抱犢山人其自號也銘曰

大江之北浮渡之東抱犢墜崇是爲詩人之幽宮林高谷空寥寥冷風如或吟嘯於其中

孫母許太恭人墓誌銘

并序

太恭人常州宜興許氏女武進孫氏婦考諱建康熙辛卯科舉人廣西義甯知縣舅諱謀康熙辛未科進士禮部主客郎中夫贈中憲大夫諱枝生主客之第二子也少而父母皆喪其兄鳳飛爲恩承州吏目攜至廣西義甯見而愛之遂以女與之爲贅壻於義甯官舍二一年生子孝勳又二年贈中憲大夫卒時恩承已前喪矣而義甯無子度兩姓後皆無依頗欲奪女志太恭人以死誓且曰女在何

不若兒耶數年義甯卒於官太恭人奉 夫兩柩

踰嶺嶠泌湘越洞庭歸於江南訪求武進孫氏僅  
一字而五世同居之太恭人分有敝屋兩間而已  
以宜興贈嫁田易之於武進得二十餘畝不足供  
食於是晝則紡織針黹以助食夜則課子讀子有  
過必撻之撻畢必大慟其後孝勳中乾隆丙子科  
舉人又後十年得句容教諭太恭人從武進至句  
容乃命以武進田爲祭田曰子有薄祿吾田宜奉  
公矣又後二十三年孝勳爲河曲縣知縣其時太  
恭人之孫星衍以丁未科一甲第二名入翰林矣  
太恭人乃從居京師其後星衍爲兗沂道孝勳亦  
請告從太恭人居山東後星衍以母喪去官再起  
爲山東督糧道太恭人乃又與子至德州嘉慶十  
年六月十九日卒於德州官舍年九十八其平生

嚴整不苟言笑而御下和恕未嘗以重語詈之體  
素健彊當星衍去官居金陵燕山侯祠祠有假山  
小樓太恭人年九十矣時輒不杖登之至於終壽  
而神明不昏也居武進時歸葬其父宜興母亡又  
葬其母及子孫既貴矣命買田宜興供許氏祀而  
孫氏家祭後必祭許氏以報義甯德焉始以節孝  
舉得 旌表卒以子及孫貴累封至太恭人子一  
孫三星衍星衡星衢嘉慶十年十一月 日孝勳  
葬之於武進夾巷口附於贈中憲之墓桐城姚鼐  
爲之銘銘曰

懿女少罹洊閔酷矣秉節濟危峙熒獨矣忍寒與  
飢命子穀矣天褒以壽康食祿矣同穴於茲貽裔  
福矣

王母潘恭人墓誌銘并序

潘恭人者通政司副使王公友亮之配也通政家本婺源而居江甯故娶於江甯潘氏贈武德騎尉安慶衛守備朝士之女年十八歸於通政事公姑能恭以承意事夫能任家事之煩俾通政得專力以成其學行當通政仕於京師時通政母林太夫人在堂恭人侍之於家代通政之孝養旣而林太夫人就養於都而恭人以子女衆多婚嫁未畢尚留里中王氏故富室也及通政仕而家已落官愈進則貧益甚然人猶以富家缺望之惟賴恭人捃搗經營以供京師及里中之用其所任有甚難者通政於乾隆六十年以給事中巡視南漕至揚州恭人乃一往揚州蓋夫婦不相見者十八年矣於是始一遇而逾二年通政卒於官矣恭人三子時長者行恕旣喪次麟生終父喪旋亦喪恭人撫兩

嫠婦及季子諸女悲哀勞苦整理其家常如一日  
自奉極薄而與人惟恐不厚年既老而早暮治事  
如少時凡姻親中外見之者未有不歎其賢而愍  
其瘁也又後將十年季子鳳生乃仕爲浙江通判  
三署府同知恭人從之官所於嘉慶十四年十一  
月八日卒於杭州年六十九恭人事佛甚謹而慈  
仁恭儉出於天性喜言人善聞有言人過者必正  
色止之雖婢僕未嘗重詈也六女皆適士族其季  
庶出也恭人愛之甚以亡而慟故病遂至亟有孫  
一世林孫女四曾孫二當通政之亡鼎爲之銘墓  
矣嘉慶十一年二月一日其家將以恭人合祔復  
請銘焉其家世已詳於通政銘內者茲不復具云  
銘曰

賢者勞智者憂男外勤女內修懿恭人敬有謀視



室中有與不厲黽勉靡安爰昌厥家貽多休惟母德不可酬銘厥藏慰明幽

張母鞠太恭人墓誌銘并序

太恭人淮安鞠氏候選州同知諱文燦公女年十六歸於銅山張氏贈中憲大夫彰衛懷道故宿北河營守備諱瑞贈中憲適夫人王吳兩恭人皆先喪無出而上有母王太恭人惟鞠太恭人至能敬事以助中憲之孝生子裕慶十一歲而孤卒能教督以成其才仕至河南彰衛懷道而太恭人被國恩晉封焉始贈中憲復有歸陳兩孺人各生子一裕福彰衛兄也一裕臣彰衛弟也晉繼緜喪母太恭人撫育教誨其意誠至三子若一其後又成就福與臣之子皆並登仕籍矣當贈中憲之亡家貧子幼太恭人茹苦勤力守之以至子仕既貴

而飭躬如故戒約其家勿侈費至於施予親族內外則以時而加豐惟恐弗至平日愛子甚篤及裕慶以逆匪自川陝擾及河南從巡撫入營壘擒捕勁寇如是者三年太恭人時勉以盡力效忠而已毋念己也河南屢被河患裕慶以府通判蒞功防護及治衡家樓河口險工尤勞瘁太恭人勉諭之終不及私故子之績成官擢而封加母氏世以爲宜太恭人壽至八十於嘉慶十二年九月二十五日卒於彰衛道官舍裕慶自銅山遷居金陵故於嘉慶十三年十月十一日葬太恭人於上元縣東五十里張官山之陽以狀示姚鼎請銘太恭人一子得一孫保成方幼一女適宿遷附學生羅璞璞之子紳從鼎遊又鼎有叔嘗從居彰衛官所甚久夙聞太恭人武賢如狀故爲銘曰

儼其秉德賢以壽子爲國材用未究恩褒母氏疊  
且厚金陵東南鬱深秀蒼山四周中一阜卜萬世  
藏昌厥後

太子少保兵部尚書總督江南河道提督軍  
務兼右副都御史徐公墓誌銘并序

公諱端字肇之湖州府德清徐氏曾祖庠生諱元  
臣祖舉賢良方正岷州知州諱志丙考涉縣知縣  
候補府同知諱振甲三世皆以公貴贈太子少保  
資政大夫公生而強記明達涉縣贈資政公始仕  
江南知蕭陽清河縣皆臨河公年二十從官佐治  
於隄防疏導之法身習心解及從之涉縣助挑引  
河工竣先諸吏阿文成公奉使在河上見以爲才  
公於例應選通判卽奏留於河東河工遂補蘭儀  
通判逾二年蘭儀改爲同知官卽以公升任調睢

甯及開封下南河同知其間屢遭大河漲警塞禦  
得宜河南稱其績乾隆五十八年大計薦卓異護  
開歸道印值湖北邪教爲亂從河督帶兵赴湖北  
界防堵有功 賜戴花翎旋以江南總督兩河督

合請以公署兗沂曹濟道其年睢州河決曹州河  
涸公豫築河北兩壩以待水至及睢州決口合河  
至曹漲甚賴壩以安 今皇帝親政公引 見

以知府用其冬授饒州府知府江南總督河督請  
調淮安府旋加道銜逾年擢淮徐道值改淮徐道  
專轄徐州公居任遭贈資政公憂其時河南衡工  
河決 上憂河事甚 命回籍治喪百日回徐

州道任其後令以三品頂帶署河東河道總督公  
至衡工決口初塞善後之政皆公籌也是年冬卽  
補授江南河道總督逾一年 上命設河督正

副官以戴均元爲正督以公爲副逾二年戴公病歸公復爲正其年冬又改爲副逾一年裁副總河而公復爲河道總督公自嘉慶十年居江南河督任至是六年明習河事授吏程功羸絀必如所計躬耐勤苦以趨險急賴以安者屢矣時有議改河入海之口者公往相視以爲不可迄今河入海循故口甚利皆公識之當也然而大河多變非盡人力所可施而國家以河淮濟運泛涸或引濁入清漲急或權輕重決彼隄以保此岸於道道民居安得無傷故公之才與所處之難皆上所深

悉也而國有正法在任值有河患安能引天災而不爲法受過故嘉慶十五年冬遂令去職仍留工次公於是每遇要工必以身先衆次年冬以治碭山李家樓決口旁開引河公任其事嚴寒積勞遂

至病甚世謂使其功完事定天假之年必復爲

上所褒擢而公竟不能待然其所已見於世者

亦可稱矣公著有迴瀾紀要安瀾紀要二書年十

二而妣錢太夫人喪與母弟妹甚友愛及贈資政

之亡遺庶子及兩女皆幼稚公撫之悽惻恩勤尤

至見者爲感動焉夫人蔡氏生二女側室張氏生

一子鏞 女謝氏生一子鏞 女公年六十二以

嘉慶十七年四月初六日卒以嘉慶 年 月

日葬於

銘曰

河流渾渾東屈淮瀆朝治而平暮忽改奔效功以

人底績者天佶維徐公 國之勞臣載在水官三

十其年有勤其襄有資以安鬱蘊餘志曰瘞茲原

贈奉直大夫翰林院編修加三級鄧君墓誌

銘并序

君諱巨源字崑發其先高密鄧氏遷居閩宋建炎  
初有左正言肅以直言著於宋史其後世屢遷明  
末居壽州入國朝有順治丙戌科進士陝西泃  
岷道按察副使旭始自壽州遷爲江甯人生貴池  
訓導焯焯生廩膳生重及堪重無子以堪子附貢  
生贈編修鑽嗣是爲君考君生而好學能文爲江  
甯府附學生爲人孝弟恭謹其父晚病偏枯侍疾  
不離側扶持抑搔數年不懈父以爲安教子嚴必  
使近正人延其從叔某爲授讀禮敬甚至後某老  
矣無嗣君朝夕饋之食其於宗黨戚友多施惠君  
年五十五於嘉慶元年五月卒娶陳太宜人同縣  
歲貢生延年之女也君之事父母爲善太宜人能  
盡力以相之君族叔某喪於君亡之後而終不失  
奉養之宜者太宜人力也持家勤苦儉約及子旣

貴猶不改最以廉正而已年六十九卒於嘉慶十七年二月生二子長廷楨嘉慶辛酉恩科進士翰林院編修甯波府知府君考及君皆以廷楨在編修任得贈奉直大夫翰林院編修加三級君妣彭太君贈太宜人陳夫人封太宜人次廷樑先卒女一適王世琛君亡時已從葬考墓於江甯城南矣及太宜人沒嘉慶十七年十一月日合祔廷楨乞姚鼐追爲銘銘曰  
篤行好善生抑弗顯其卒光衍懿媛在閩佐志繼  
繼同藏鞏榘

周青原墓誌銘并序

乾隆三十年春

高宗純皇帝南巡江浙合

江南士之獻進賦頌者召試於江甯自十六年

南巡至是二召試士矣是年定爲糊名閱卷取



中尤嚴而江甯周君以廩膳拔貢生入試 欽

定爲一等 賜舉人授內閣中書舍人君之名

乃大著於天下君入都供職旋入軍機處辦事一  
夕內直 上偶問得君名歎曰此吾南巡時

所得江南才子也時大臣無不欽重君者君兩會  
試未第倏挂吏議君時年才逾三十耳而意沮喪  
無仕進之志君故通曉天下利病又善爲文奏旣  
退閑於是四方督撫多請君入其署爲章奏而君  
亦藉以遨遊徧天下當君之得過以人有來探事  
者君對不知後其人得罪引君及同直軍機者皆  
未泄密也吏有與軍機官相惡者卽以不嚴斥探  
者傅重比鐫級其後與君同罪者復進用至卿貳  
而君獨遠迹都門雖其居幕府爲奏之善多爲天  
下稱誦而身一見枉終放廢以至於老此天下所

共慨惜也君諱發春字卉含其號曰青原人皆呼  
之故青原之稱尤著余初於京師見之其文章書  
法之美交遊中所希見而議論和平與人接恂恂  
溫良人也余歸里主皖中書院君時來皖得再見  
甚歡余後至江甯而君尚依君子之桂於皖遂不  
見而之桂今以君柩歸矣君夫人沈氏賢而早沒  
生二子之桂安徽候補知縣之桐先喪嘉慶十六  
年十月十日君卒年七十四次年 月 日葬於  
江甯南吉山之麓夫人沈氏先葬於是今以君合  
焉爲之銘者桐城姚鼐也銘曰  
才高不盡其能名著不究其升智可逮遠而身失  
其憑惟其君子長者也卜其後之式承

中憲大夫杭嘉湖海防兵備道長沙周君墓

誌銘并序

君諱克開字乾三先世自豐城徙長沙明末張獻忠破長沙脅降諸生周繼聖至斷腕不屈者君五世祖也其四世孫宣智中乾隆甲子科舉人爲激浦教諭以君貴贈中憲大夫君爲贈中憲之長子少有盛才後父一科而爲舉人乾隆十九年以明通榜引見發甘肅以知縣用授隴西知縣調甯朔甯夏之田拉河爲渠歲得河新水則腴得湖山宿水則饑且瘠故渠有引河之闌又有洩宿水入河石竇民謂之暗洞君在甯朔值唐鐸渠暗洞崩塞渠水不行上官從他吏建議填暗洞而竭唐渠入漢渠以便甯夏之引河君念暗洞廢則甯朔水無所洩夏秋水盛民且溺力請修復之夏民以爲農事近新水將至不可待君約以五日爲之乃取故渠廢闌之石晝夜督工五日而暗洞復立又嘗

爲甯夏治唐延漢來及大清三渠皆前吏治之無  
功者君受檄相度或濬或徙至今民賴其利君再  
以卓異薦擢知固原州父喪去官服終爲姚州知  
州擢都勻府知府調貴陽府在都勻時嘗從巡撫  
與總督吳達善侍郎錢維城治貴州苗民爲逆獲  
其首從鞠之君謂錢侍郎用法有不當者固爭不  
爲下在貴陽亦以強直忤巡撫宮北麟二公始皆  
憾而卒以重君旋以公累解職引見復授蒲州  
府知府調太原府大清積案修復風峪曰隄堰障  
山潦而導入汾始君在甯夏治渠作閘民謂之周  
公閘至太原民亦德之於隄上作周公祠云擢吉  
南贛甯道署布政使事以王錫侯書案被罪然

高宗素知君賢吏也乃發江南以同知用值

駕南巡君以署江甯府見上命知九江府擢

浙江糧儲道又調杭嘉湖海防道值改建海岸石塘君葺其工總督欲徙柴塘近數百丈以避潮君曰海不與河同徙而讓之潮益侵無益也力爭得止君督視勞甚致疾然猶不懈在任年餘以乾隆四十九年七月二十日卒年六十一君生平所莅官皆有績善治獄多所平反禮儒生以私錢興書院而性尤廉其授糧道盡革舊徵之濫而身與上官約不取一錢之賄上官故移之海防也沒後家無餘貲娶張恭人先卒生子有聲乾隆六十年進士貴州大定府知府次有度早殤女三側室童氏生子有蕃國學生女一有蕃年未三十而卒君與張恭人合葬本邑河西鄉蘊玉山嘉慶十年有聲將復治其墓桐城姚鼐銘之銘曰

矯立其義惟堅以毅惡恤予忌奮襄民事辨害興

利河壩海滋方略載備衆曰君恃生爲良吏沒而民祀貽庥厥裔銘告千禩

中議大夫兩廣鹽運使司鹽運使蕭山陳公

墓誌銘并序

公諱三辰字北樞先世居義烏自義烏遷山陰之臨浦鎮鎮去蕭山城二十里居者多貫籍蕭山故公六世祖至公皆稱蕭山人曾祖嚴州府教授贈奉直大夫諱正治祖縣學生諱常敬考金壇縣知縣諱逢霖祖考皆贈中議大夫公少爲蕭山縣學生援例爲安徽縣丞升鳳陽縣知縣以獲鄰州巨盜升府同知借補亳州知州亳州巨州也訟者日進狀數十公得其狀卽訊卽判逾月訟者稀半年則鮮矣乾隆四十九年河南柘城民王立山爲亂距亳州百餘里公聞卽募鄉勇得千餘人練習之河

南官兵爲立山所敗公度立山必至設伏路左右而自待於城外立山入亳州境見無備易之趨城忽見兵駭而戰伏起蹙之衆遂潰生禽立山其年安徽大饑上官令亳州設兩粥廠以賑公計一州兩廠何足贍饑者自增三廠分設境內又收民棄男女者集於佛寺令一老嫗撫孩幼十如此數十處身時周巡其間計其費上官發銀曾不及半移用以濟之人謂如此終必以虧庫銀獲罪矣公曰活民而得罪吾所甘也當公禽王立山時大學士文勤公書麟方爲安徽巡撫至亳巡其戰處太息曰君將材也及覩賑民增廠愈賢之令藩司盡補公所費公以無累世以此益稱文勤爲知人也而總督不喜公奏禽立山事不敘公績

純皇

帝見奏以理勢隱度知公之賢卽令引

見加直

隸州公旋知泗州時書文勤爲總督保升知府引  
見授常德府知府調長沙府會征鎮筸苗亂公  
總理糧餉隨戰於平壠大捷加道銜嘉慶四年擢  
廣西右江道屢署布政使按察使十一年大計卓  
異十四年擢兩廣鹽運使公才高識遠遇事陳說  
慷慨屢署兩司勞於吏事及授運使事逸而衆所  
利也公遽以老疾請辭職以去仕安徽時買宅江  
甯城內及謝官歸江甯令諸子出仕自穿池種花  
時會故人君一日謂姚鼐曰吾死君當爲吾銘  
墓卒前一夕召客飲酒劇談夜端坐而卒爲嘉慶  
十七年五月二十五日去官二年矣年七十有七  
先娶孫夫人生一女卒繼娶方夫人生四子一女  
子候補知縣星珠府通判星華布政司庫大使星  
軫布政司經歷星景側室王氏生一子未入流星



德以嘉慶十一年某月日葬姚鼎銘之銘曰

仁及於民法可遠施功著於時中蓄餘才任於繁  
勞去彼膏脂惟以明智蹈夷遠蠟清曠江城終以  
懌怡

奉政大夫順天府南路同知歸安沈君墓誌

銘并序

君諱錦字中甫歸安沈氏自宋元有聞人矣君之  
高祖鉞貢生贈湖南按察使以德祀於鄉賢祠曾  
祖慶曾康熙庚辰科進士四川會理州知州祖世  
杓康熙甲午科副榜江西崇義知縣父麟炳增生  
祖父兩世皆以君貴贈奉直大夫薊州知州君少  
以文名以庠生中乾隆己亥恩科浙江鄉試以  
舉人直四庫書館敘勞以知縣分發直隸授蠡縣  
長垣知縣嘉慶二年大計舉卓異擢薊州知州旋

病後痊引

見

上命往陝甘以知州用時直

隸總督知君賢習直隸事奏留於直隸補安州知州州數遭水患有田畝久沒水者賦額猶存君履視知其病固請於上官奏除之嘉慶十年擢順天府南路同知南路所轄七州縣民俗悍而健訟君恩威兼施能燭其姦竇俗爲之戢又兼署治中府尹每倚君以治事畿輔殷繁君明習於事而敢任之勞憊益甚嘉慶十四年君六十有七矣遂堅以病辭任君仕終始在直隸直隸民佩其德者甚多其尤著者始署大名縣值段文京亂後捕餘黨安善良最有鎮定之功在蠡縣瀦龍河漲欲決隄矣君盡力護之身立風雨隄竟以固以艱去蠡民泣送者塞路過清苑忽有數十人素衣來拜送者問之皆君在省讞獄所平反人也藁城嘗被災吏散

賑不善飢民怒噪欲死其令省中或議以兵往君謂必不可自請單騎往諭散其衆入城摘令印坐廳事決胥吏數人定其賑事一縣遂以帖然君之謝病也其三子惇厚方知雄縣乃赴其官舍其次年四月晦卽卒於雄縣年六十有八夫人長興朱氏爲歲貢生贈奉政大夫兗州府同知謙鏊女溫惠賢孝君少而爲客四方壯而在官而卒不以家事累其心者夫人力也誥封宜人嘉慶十七年九月二十八日宜人卒年六十有九生子四長育乾隆乙卯科順天副榜杭州府訓導次敦彝兗州府運河同知次敦厚雄縣知縣次敦典嘉慶戊辰恩科舉人女二長壻嘉慶辛未科進士庶吉士吳縣戴葆瑩次壻候選主事青浦徐光煒孫八人以

嘉慶

年 月

日合祔於

山

銘曰

沈族武康蹶興南朝誕暨今時播聞益昭君始文  
士起膺吏事功載紀能庶民懷懿輔於畿南劇殷  
是堪斂翮退飛不究所覃莘莘賢子繼爲國才懷  
槩操符駢秀聯瑰亦有魚軒內修其德同祔嘉壤  
貽床千億

贈奉政大夫刑部郎中南昌縣儒學教諭鄱  
陽胡君墓誌銘并序

君諱祚安字紹濂其先世居婺源有胡學爲唐散  
騎常侍學之後十餘世遷居樂平又數世遷鄱陽  
琳橋里當明季有諸生居晉君之曾祖也君祖諱  
文炤入國朝爲居士考諱世高以君仕時贈修  
職郎以孫克家貴累贈中憲大夫惠潮嘉兵備道  
君之妣曰詹恭人生二子伯常及君而殞繼妣徐

恭人生子濟民贈中憲暮年得風痺病臥起待人  
扶掖君時尚幼入塾讀書稍閒歸侍疾左右甚得  
其宜勤苦無倦色見者爲悲之及旣孤兄弟相依  
力學奉母其季弟尤聰慧君自課之誦讀愛友甚  
至而季弟竟以羸喪其時徐恭人有喪明疾又遭  
愛子之殞不勝其痛君承事婉至苟可以慰親者  
竭盡其力無勞與難於是己中子爲季弟後自  
是數十年奉侍安養徐恭人以終君篤學工力爲  
文旣冠爲鄱陽學生中乾隆二十一年江西鄉試  
屢試禮部不第卒乃授南昌縣教諭君平生爲己  
及語人皆以敦行爲先而後及於文藝及爲師儒  
之官尤以是爲訓從遊聞其言者多有動焉當四  
庫全書館之開 朝廷蒐求祕書而因有以藏違  
禁書相告訐者亦有本非違逆而姦人以妄詆所

怨牽致官所人心惶惑君承上官檄主其事乃開  
示條目分別應呈繳毀與否人遵其教數旬而畢  
無被罪者衆以謚甯南昌有爲匿名書謗豫章山  
長張之衢其山長意疑爲某兩生也告巡撫禡兩  
生攝罪之君知其枉辯於上官未許君執之益力  
兩生卒賴以全君遇事能別白是非又堅定有守  
雖職卑所及不廣而所用意有足稱矣君卒於乾  
隆四十五年六月年五十三娶童夫人生子四長  
國子監生克恭次廩貢生候選訓導克勳次乾隆  
庚子 恩科進士今安徽巡撫兼提督軍務克家  
君所命爲季弟後者也次候選知州克健孫五曾  
孫一君始亡浮屠於里今獲卜兆於 縣 山之  
原嘉慶二十年 月 日遷窆於是桐城姚鼐爲  
之銘曰

有懿修士操始孝弟婉愉在室祥被門外以儒爲  
官亦正厥誼載施未閔餘慶斯大繩繩後賢卜茲  
松隧迺鞏幽藏降嘏百世

實心藏銘并序

實心藏者兵部尚書總督浙閩軍務桐城汪公之  
生壙也公自言平生惟矢心去妄而存實焉此念  
無間於終身故以名其壙且著說以示子孫以謂  
歿且不棄實心況生者乎又以說寄同里姚鼐使  
爲之壙銘鼐謹案公名志伊字稼門以乾隆八年  
正月 日生年二十九中乾隆辛卯 恩科舉  
人其歷官爲靈石知縣霍州知州鎮江蘇州知府  
蘇淞糧道江南按察使甘肅浙江布政使福建江  
蘇巡撫工部尚書湖廣浙閩總督其政績之美甚  
衆而其尤著者山西有孟木成者爲人誣以殺死

張光裕一省之官皆定爲情實矣公驗其兇刃甚小與傷痕不合所序情節甚乖舛執以爲誣 欽  
差至猶頗以讎衆案爲難也公辨之詞證明而義  
堅正木成卒得生公名由是大起東南之漕爲天  
下至重公爲糧道及浙藩尤能清理之使輸者不  
困而官運充自昔江漢汎溢沈浸民田或數十年  
且數百里公督湖廣時奏請建閘濬河而建立隄  
工親往督視用財實而工鞏至今爲利其察江盜  
尤嚴密法當而令行及在閩治海盜事皆整辦江  
海行者靡弗頌焉其自勵訓士及誨其家子弟一  
皆出於儒者之正義而歸於實心則公所自得之  
要也是藏成於嘉慶二十年公年七十二矣鼎謂  
古人多以垂暮之年復大建勳業若漢趙營平宋  
文潞公皆以八九十而更有事功載於史傳今公



雖逾七十而精神尚健足爲 國任前日之事可  
書後日之業吾不能紀然惟一以實心之道成之  
則事雖未見理則可明大人君子之道一於誠而  
已以是作公藏豫銘可也公會祖諱

考諱

皆以公貴贈資政大夫妣皆贈夫人

公夫人姚氏先卒已別葬子

孫

銘

曰

國政巍崇寢食之細悉以誠將一言可蔽猗惟汪  
公名德重臣塞淵其心自矢畢身其行未央焯其  
已見銘告千禩爲士林勸

小真... 美... 區...

曰民... 曰...

公... 曰...

曰... 曰...

曰... 曰...

曰... 曰...

曰... 曰...

曰... 曰...

曰... 曰...

曰... 曰...

曰... 曰...

惜抱軒文後集十

記

晉鎮南大將軍于湖甘敬侯墓重修記

晉丹楊甘于湖敬侯卓初起有平石冰陳敏之功  
逮元帝太興中屢著勞績封于湖侯爲安南將軍  
梁州刺史假節鎮襄陽有惠政於襄陽及王敦稱  
兵爲亂侯露檄致討聲動京師事皆詳於晉書本  
傳當王敦逆志方盛下據石頭兵勢旣振矣然止  
於殺周顛戴淵而退終未反篡代者畏侯據其上  
流其露檄遠近足以讐其氣也然則侯雖被害於  
敦不獲以功名終然固可謂大有造於王室矣其  
喪後歸葬丹楊迄隋滅陳廢丹楊縣析丹楊北境  
入江甯故侯墓今在江甯界人呼其地曰甘墓岡  
甘氏居其側者尚有數百家云皆甘侯後也墓碑

中失有鉏地者得碑曰梁州刺史甘府君墓乃復  
辨之然墓崩壞屢修不固嘉慶十六年裔孫福字  
夢六出財修之於墓門之前環巨石為址可以歷  
久不圯乞余為記自余來江甯欲尋晉室建平諸  
陵及當時名賢墓隴如李白所云衣冠成古邱者  
皆漫無其迹矣惟甘于湖敬侯及卜建興忠貞公  
墓修整可瞻良以兩公皆有子孫恆依此土時省  
飭以彰前烈之賢此固考古思德者所為深幸矣  
而夢六追遠致恭之意亦足稱也嘉慶十六年四  
月 日桐城姚鼐記

安慶府重修儒學記代

古有成均鄉黨州閭之學而無祀先師之廟釋奠  
則於學設席以祭祭而徹之後世學廢而孔子之  
廟興至宋乃因廟為學自元明至 國朝悉因其

制觀仰聖人以啓學者效法之思制異於先王而  
意未嘗不合也安慶府治始於南宋嘉定年黃勉  
齋先生之所營建意此府學之興亦必始勉齋矣  
恭維我

列聖御宇以朱氏之學訓士而勉

齋朱子之高弟也其守此郡以朱子之學教於一  
方雖當時支撐江淮戎馬之間不竟其志事而其  
意可思也昔當朱子時有象山永嘉之學雜出而  
爭鳴至明而陽明之說本乎象山其人皆有卓出  
超絕之姿而不免賢智者之過及其徒沿而甚之  
乃有猖狂妄行爲世道之大患者夫乃知朱子之  
教之爲善也近時陽明之燄熄而異道又興學者  
稍有志於勤學法古之美則相率而競於考證訓  
詁之塗自名漢學穿鑿瑣屑駁難猥雜其行曾不  
能望見象山陽明之倫其識解更卑於永嘉而輒

敢上詆程朱豈非今日之患哉安慶府學歷代屢  
有損壞脩復今某來撫此土又值其年久功弊乃  
合官民計量出財而脩之自嘉慶十三年 月起  
工至次年 月畢工用銀一萬 千 百兩自大  
成殿外及門廡階砌及旁附祠靡不整飭吏民請  
紀其事余幸當海宇清晏庠序大興之日臨勉齋  
之舊治仰企勉齋道德渺不可追惟近推 聖  
天子崇教之心而遠循朱子勉齋之舊訓願諸生  
入是學者一遵程朱之法以是爲學毋遷異說至  
其修建興革之細碎者則不足載云

重修境主廟記

龍谿水出羣山之中衆谿交絡匯而奔出龍眠之  
口橫嶂塞谿隘是建境主之廟唐中葉桐城丞張  
公孚卿有德政於茲邑歲旱禱雨水大至溺焉縣

人思而祀之於此謂之境主自唐至今廟或圯敝  
民輒新之豈非賢者之澤垂留者遠而愛慕者深  
哉嘉慶十三年歲大水潛霍山中蛟出毀田廬殺  
民人患甚劇而桐城獨免民尤以謂張侯之庇我  
也其祠有損壞者衆出財脩而新之是年秋未余  
自江甯歸往遊龍眠策杖渡谿水至公祠下瞻新  
宇之旣成同衆仰戴公之無斃也遂書爲記云

萬松橋記

徽州之縣六其民皆依山谷爲邨舍山谷之水湍  
悍易盛衰爲行者患故貴得石橋爲固以濟民吾  
至徽州觀其石梁之製堅整異於安徽他郡蓋由  
爲之者多石工習而善於其事故也黟之東南有  
葉邨邨北大溪東流達休甯漁亭以合新安江水  
邨東西各有小溪北流入於大溪兩小溪上有石

橋四皆葉君廣芥一先人之所爲也而大溪曲當  
邨口有萬松亭亭側架木溪上爲橋曰萬松橋時  
爲大水決去邨人病之欲易石久矣然其功巨不  
可就乾隆五十三年夏徽州蛟水發葉邨之南山  
崩阨壞田廬毀橋岸其後數年民脩田廬旣飭而  
山之崩壞未復地脉虧敗葉氏以爲憂羣出財脩  
之衆舉葉君掌其事壘石培土山之形勢不逾月  
而完餘銀數千兩衆喜復請君董爲石橋於邨口  
當昔蛟水之發山隕一巨石於地方三丈餘葉君  
視其質堅而理直取爲橋材嘉慶七年九月橋成  
長十二丈廣丈六尺高如其廣仍名之曰萬松之  
橋猶有餘石與銀葉君使工復爲石橋於其溪之  
上流曰西閘橋而邨之左右舊橋盡脩而新焉當  
蛟起之年余適在歙見被害者之遠且巨甚可傷



痛今葉公爲橋乃反因其隕石之力因禍爲福轉  
敗爲功豈非智乎余嘉葉邨之族不吝財以營公  
事而又得葉君之誠篤而明智善任其事以督之  
故衆工無不舉是皆足書也嘉慶六年八月桐城  
姚鼎記

節孝堂記

國家於女子節孝著聞者有旌揚之典有列女之  
祠所以表章潛德風勵閨闈者蓋至矣然天下賢  
女秉節守道或實可貴而於旌表之例有不合抑  
或身亡無後及有後而衰困穉弱不能舉報其爲  
懿美吏不能知若是者亦有之是以江甯孫生金  
相作節孝備考錄以廣旌典所未及者其書夙爲  
節使守土諸賢所稱善矣惜孫生蒐舉未已而身  
泯喪江甯士大夫皆欲依其法考詢而增益之郡

中故有恤婺公局今司其局者就其堂爲錄中節  
孝祀所地狹不能人立一位乃合作一神牌而列  
書之春秋得展禮焉名其堂曰節孝之堂其續有  
稱舉可徵者同人爲核實再刻續編而後書之以  
防遺濫余登其堂嘉諸君之誼輒書以爲之記云  
嘉慶十一年五月五日桐城姚鼐記

甯國府重修北樓記

佳山水名絕著爲古今賢士君子所頌歎四海之  
內可百餘區雖其所以稱盛之故大體略同而其  
間各負絕異之境非人意度所至有必不可以相  
似之地儷而一之者此天地之文也君子因所身  
遇覽天地之至文以養神明之用是爲智而已若  
夫較量優劣之論則智者所不爲余素持是論往  
時丹徒王禹卿侍讀最取其說而稱之今夫江以

南列郡之名樓鎮江有北固甯國有北樓其山勢皆自南入城陂陀再聳樓當城北而面南山此圖可傳言可著者也而其各有獨絕之異境非親覽不知圖與言不能具也而此二樓皆在太守署內余嘗數至丹徒不識其太守不獲登北固幸識甯國太守魯君矣而余足迹未至宣城二地之勝故皆想慕而不見焉嘉慶十一年魯君爲守之二三年治內謚安惜故北樓之頽敝命工飭之旣竣以書告鼎使爲之記余謂君賢明仁決善吏事而能文章可謂智者也又王侍讀弟子家於丹徒而臨宣州其成是樓也余雖未登而能用吾意以觀於其間將以踰越謝元暉李太白之所舊得者非君而何爰書以爲之記君名銓乾隆庚戌科進士其樓之落成在嘉慶十一年 月桐城姚鼐記

遊故崇正書院記

江甯城西倚山古因其勢作石頭城今古城盡變而石頭之一面不改也石頭城內清涼山巔有翠微亭南唐暑風亭址也亭下稍西有僧寺南唐所爲清涼寺也寺之左明戶部尚書耿定向爲御史督南畿學時建正誼書院於此迄張江陵柄國毀書院江甯諸生改爲祠以祀定向至國朝祠亦頽弊矣今釋展西居之飭脩其祠宇具完因建前後屋以奉佛居僧而俗猶因故名呼曰崇正書院其前有竹軒窈然幽靜可以忘暑後依山作小室丈許啓窗西向則萬樹交翳樹隙大江橫帶明滅其間爲登覽之勝余來江甯每褰裒翠微亭畔四望曠邈輒回憩其室展西亦喜客來具茗食相對今年余與太倉金麓邨錢塘葉心畹至者再矣展

西欲余有紀因書以遺後來遊者俾有考焉嘉慶  
十三年三月晦日記

甘氏享堂記

先王之禮墓藏而廟祭戰國乃有祭於播間至漢  
時而有塚舍蓋原涉以塚舍著名於哀平王莽之  
世夫有祭則當有舍原涉特以舍之僭侈逾於常  
人耳計當時塚之有舍非第涉也至東漢而謁墓  
之禮上自天子下徧於士大夫之家此後世因俗  
制宜使先王復生必以爲不可廢也江甯甘夢六  
福爲晉甘敬侯之裔嘗修敬侯之墓余爲之記矣  
茲爲其先君葬江甯南靈母山之東北去城五六  
十里歲時省墓祭祀無所託居乃買田建享堂六  
間於墓麓之前復以請余余聞夢六之先君子生  
有孝行而夢六繼之敬共於墓祀自遠祖及近皆

有稱焉此固君子所樂予也因爲述古今之異禮  
而以當乎人心者爲貴乃復爲之記云

### 先宅記

竊先世自餘姚來桐城始居麻溪南至八世葵軒  
公居栗子岡南十世芳麓公居城中天尺樓宅先  
高祖端恪公居北門雁軒曾祖居南門宅曰樹德  
堂麻溪南宅今猶爲世寬公後人居之栗子岡南  
宅其宅與田今屬中翰公房裕綸守其業堂懸芳  
麓公爲禮部郎時楹尚存焉天尺樓宅至職方公  
令八房分居是宅以遺幼子故至今爲第八房竹  
塢公後人居之天尺樓者其門樓名也宅最後居  
樓五間鐵松中丞截居樓爲職方公支祠乃與天  
尺樓宅隔分當芳麓公之世有鐵斧負木甑從空  
飛來其聲薨薨甑內蒸杭猶熱釜容四斗許今在

祠樓上雁軒者端恪公買北門倪氏宅也自天尺樓宅徙居之後五房分居其宅亦以遺幼子故爲第五房朝邑公後居再世售於潘氏潘氏毀折雁軒而別構焉先曾祖羅田公自雁軒徙入樹德堂居四十年鼎生於樹德堂八歲時宅售於張氏伯父太史公與先贈大夫乃徙北門口之宅曰初復堂今七十年矣宅少人衆不能容必有徙鼎因修譜併記先世宅於此以爲後人考信焉嘉慶戊辰臘月朔鼎記

朱海愚運使家人圖記

右圖一卷凡六人偉丈夫据盤石正坐長髯下垂者朱海愚運使公也衣藍簪桂憑檻坐若有言者夫人梁氏也左侍兩少年立稍前者公之長子字白泉者也後立子執蘭藥進者公次子字蒼巖者

也姆抱小兒帶銀環倚檻右立者公孫奕勳也乾隆四十三年運使公年五十在揚州兩子未仕甫得一孫使工畫其家人相聚之樂如此鼎於乾隆十七年入都與公相知公時尚無子也其後公仕蜀中余仕京師相隔數年公返及復得見公守泰安余解官至泰安歲暮風雪同登泰山夜觀日出公自爲之圖及公至揚州邀余主揚州書院於是相聚者兩年公旋病歸京師遂沒於京師至今日余不見公三十四年矣而復展對公像爲之隕涕公夫人已前沒次子蒼崖當得太守而亦病沒惟白泉再爲江南觀察與余相見最久爲出此圖其時白泉子奕勳爲山東黃縣令有聲圖中之銀環兒也白泉復有三子二孫蒼巖亦有子二人孫四人皆生於作圖後者家祚方盛可慰公地下余獨



追感今昔閱六十年有如日暮耄昏僅存愴思冥  
漠因書爲圖記云嘉慶十七年六月十七日桐城  
姚鼐記

種松堂記

乾隆時宮保方敏恪公總督直隸居保定日念贈  
光祿中翰公塋兆未定乃作白首歸來種萬松之  
圖自題詩其上欲以身依先壟極悲思慕願之意  
云其後贈光祿葬句容之葆山種松蓋不啻萬及  
公薨亦歸葬葆山之東麓蓋公生未遂依壟之志  
而藏體於斯固亦可以安公之靈矣又其後今南  
耦尚書以母吳太夫人亡葬之葆山西麓蓋去宮  
保公作圖時五十餘年矣而長松茂蔭蓋蔽巖嶂  
陰映雲霄十餘里外望之蔚然知爲方氏阡也乃  
作堂以爲墓舍遵宮保之遺意名曰種松之堂夫

所謂故國者非喬木之謂世臣之謂也今尚書將以功名繼宮保之後爲國楨幹而丙舍之護蔭於茲日久日益然則睹喬木之盛而發世臣之思者其斯堂也歟嘉慶十九年七月晦姚鼐記

餘霞閣記

江甯城西四松庵僧彌朗居也庵後倚山有軒南向本民居衆買其地歸於庵方葆巖尚書嘗邀余登之喜其崇敞而惜其荒穢也嘉慶十八年冬陶熙卿暨其從子子靜樂庵居之靜乃出財飭其敝壤種卉木治石磴作室爲陶氏讀書之所又於軒後爲閣三間西向臨江盡收江南北之山於楹內觀於夕陽時尤宜俾余名之乃取謝朓詩語以表其美且著閣所由始焉嘉慶十九年二月桐城姚鼐題并記

祭文

祭方葆巖文

嗚呼世有俊民爲時而出宜壽以康盡其才實竟  
奪以殞天胡弗卹惟昔恪敏績佐

高宗公

孤髫年已有父風占奏有儀見於

帝宮弱冠

授官旋復登第密勿禁闈決事靡滯出從戎旂遠  
踰西裔躋陟崑崙雪霜所閉裁奏氈幄招戎馬蹕  
旁行書來受爲吾隸屢以其賢見知

先帝

今皇親政方面遂膺疲羸是撫亂略是懲汔  
至清夷洽効益登建牙樹纛滄海南憑鯨波颶風  
談笑載乘萬里臺灣如涉溝塍內治外攘惠洽威  
棱爲臣則忠爲子則孝母老子遙陳辭內告

帝愍其忱朝請夕報奉母金陵寒暄菹芼出入里  
閭書生衿帽抑抑其心恂恂其貌惟太夫人旣終

其壽 天子賜慰 命官奠酌公營壤北積勞

在疚嗚呼逮今面鰲身瘦溝疾遂深不可療救

帝待公出作蕃作相民望公來雨膏保障公亦

自期終吾喪葬日月猶長庶竭忠亮年未六十二云

胡泯喪要經未除淚容屬續公今往矣海內同惜

况在親舊嘗從朝夕樽酒言笑翰墨閒作鳳儀儼

在矚思疇昔茹悲陳詞酌茲奠席尚饗

*[Faint bleed-through text from the reverse side of the page, including characters like '天子賜慰', '命官奠酌', '公營壤北', '積勞', '在疚嗚呼', '逮今面鰲', '身瘦溝疾', '遂深不可', '療救', '帝待公出', '作蕃作相', '民望公來', '雨膏保障', '公亦自期', '終吾喪葬', '日月猶長', '庶竭忠亮', '年未六十二', '云胡泯喪', '要經未除', '淚容屬續', '公今往矣', '海內同惜', '况在親舊', '嘗從朝夕', '樽酒言笑', '翰墨閒作', '鳳儀儼在', '矚思疇昔', '茹悲陳詞', '酌茲奠席', '尚饗']*

祭文